



60905

駢體文鈔卷四

箴類

楊子雲十二州箴

子雲善做所做必肖能以氣合不以形似也細尋之乃得做古之法

洋洋冀州鴻原大陸岳陽是都魯夷皮服潺湲河流夾以碣石三后攸降列爲侯伯降周之末趙魏是宅冀土糜沸兹云如湯更盛更衰載從載橫陪臣擅命天王是替趙魏相反秦拾其弊北築長城恢夏之場漢興定制改封藩王仰覽前世厥力孔多初安如山後崩如崖故治不忘亂安不遺危周宗自怙云焉有予隳六國奮矯果絕其維牧臣司冀敢告在階

冀州牧箴

悠悠濟河兗州之寓九河既導雷夏攸處草繇木條漆絲

駢四

一

絺紵濟潔既通降邱宅土成湯五徙卒都于亳盤庚北渡牧野是宅丁感雉雉祖已伊忠爰正厥事遂緒高宗厥後陵遲顛覆湯緒西伯戡黎祖伊奔走致天威命不恐不震婦言是用牝雞是晨三仁既知武果戎殷牧野之禽豈復能耽甲子之朝豈能復笑有國雖久必畏天咎有民雖長必懼人殃箕子獻歛厥居爲墟牧臣司兗敢告執書

兗州牧箴

茫茫青州海岱是極鹽鐵之地鈔松怪石群水攸歸萊夷作牧貢篚以時莫怠莫違昔在文武封呂於齊厥土塗泥在邱之營五侯九伯是討是征馬殆其銜御失其度周室荒亂小白以霸諸侯僉服復尊京師小白既沒周卒陵遲嗟茲天王附命下土失其法度喪其文武牧臣司青敢告執矩

青州牧箴

海岱伊淮東海是渚徐州之士邑子蕃宇大野旣緒有羽
有蒙孤桐蠙珠泗沂攸同實列蕃蔽侯衛東方民好農蠶
大野以康帝癸及辛不祇不恪沈湎于酒而忘其東作天
命湯武勦絕其緒祇降周任姜鎮于瑯琊姜姓絕苗田氏
攸都事由細微不慮不圖禍如邱山本在萌芽牧臣司徐
敢告僕夫

徐州牧箴

矯矯揚州江漢之游彭蠡旣潛陽鳥攸處橘柚羽貝瑤琨
篠簜閩越北垠沅湘攸往獷矣淮夷蠢蠢荆蠻翩彼昭王
南征不旋人咸躓於垤莫躓於山咸跌於污莫跌於川明
哲不云我昭童蒙不云我昏湯武聖而師伊呂桀紂悖而
誅逢干益邇不可不察遠不可不親靡有孝而逆父罔有

駢四

二

義而忘君太伯遜位基吳紹類夫差一誤太伯無祚周室
不匡勾踐入霸當周之隆越裳重譯春秋之末侯甸叛逆
元首不可不思股肱不可不孳堯崇屢省舜盛欽謀牧臣
司揚敢告執籌

揚州牧箴

幽幽巫山在荆之陽江漢朝宗其流湯湯夏君遭鴻荆衡
是調雲夢塗泥包匭菁茅金石砥礪象齒元龜貢篚百物
世世以饒戰戰慄慄至桀荒溢曰我在帝位若天有日不
順庶國孰敢余奪亦有成湯果秉其鉞放之南巢號之以
桀南巢茫茫包楚與荆風慄以悍氣銳以剛有道後服無
道先強世雖安平無敢逸豫牧臣司荆敢告執御

荊州牧箴

郁郁荆河伊雒是經榮播泉漆惟用攸成田田相孥廬廬

相距夏殷不都成周攸處豫野所居爰在鶉墟四隩咸宅
寓內莫如陪臣執命不慮不圖王室陵遲喪其爪牙靡哲
靡聖捐失其正方伯不維韓卒擅命文武孔純至厲作昏
成康孔寧至幽作傾故有天下者母曰我大莫或余敗母
曰我強靡克余亡夏宅九州至於季世放于南巢成康太
平降及周微帶蔽屏營屏營不起施於孫子至赧爲極實
絕周祀牧臣司豫敢告柱史

豫州牧箴

巖巖岷山古曰梁州華陽西極黑水南流茫茫洪波鯨堙
降陸于時八都厥民不隩禹導江沱岷嶓啟乾遠近底貢
磬錯罍丹絲麻條暢有粳有稻自京徂畛民攸溫飽帝有
桀紂涵沈頗僻遏絕苗民滅夏殷續爰周受命復古之常
幽厲夷業破絕爲荒秦作無道三方潰叛義兵征暴遂國
于漢拓開疆宇恢梁之野列爲十二光羨虞夏牧臣司梁
是職是圖經營盛衰敢告士夫

益州牧箴

黑水西河橫截崑崙邪指閭闔畫爲雍垠上侵積石下礙
龍門自彼氏羌莫敢不來庭莫敢不來匡每在季主常失
厥緒侯紀不貢荒侵其寓陵遲衰微秦據以戾興兵山東
六國顛沛上帝不寧命漢作京隴山以徂列爲西荒南排
勁越北啟疆胡并連屬國一護攸都蓋安不忘危盛不諱
衰牧臣司雍敢告綴衣

雍州牧箴

蕩蕩平川惟冀之別北扼幽都戎夏交偪伊昔唐虞實爲
平陸周末荐臻迫于獯鬻晉溺其陪周使不阻六國擅權
燕趙本都東限穢猶羨及東胡疆秦北排蒙公城壇大漢

初定介狄之荒元戎屢征如風之騰義兵涉漠偃我邊萌
既定且康復古虞唐盛不可不圖衰不可或忘隄潰蟻穴
器漏箴芒牧臣司幽敢告侍傍

幽州牧箴

雍別朔方河水悠悠北辟獯鬻南界涇流畫茲朔土正直
幽方自昔何爲莫敢不來貢莫敢不來王周穆遐征犬戎
不享爰猶伊德侵玩上國宣王命將攘之涇北宗周罔職
日用爽蹉旣不俎豆又不干戈戎戎作亂斃于驪阿太上
曜德其次曜兵德兵俱顛靡不悻荒牧臣司并敢告執綱

并州牧箴

交州荒裔水與天際越裳是南荒國之外爰是開闢不羈
不綽周公攝祚白雉是獻昭王陵遲周室是亂越裳絕貢
荆楚逆叛四國內侵蠻食周宗臻于季服遂入滅亡大漢

駢四

四

受命中國兼該南海之宇聖武是恢稍稍受羈遂臻黃支
抗海三萬來牽其犀盛不可不憂隆不可不懼顧瞻陵遲
而忘其規慕亡國多逸豫而存國多難泉竭中虛池竭瀕
乾牧臣司交敢告執憲

交州牧箴

揚子雲百官箴

官箴不及州箴之贍鍊而古澤自足

經兆宮室畫爲中外廊殿門闥限以禁界國有周衛民有
蕃籬各有攸保守以不岐昔在夏殷桀紂淫酒持牛之飲
門戶荒亂郎雖執戟謁者參差殿中成市或鼓或鞞忘其
廊廟而聚夫逋逃四方多罪載號載嘔內不可不省外不
可不清德人立朝議士充庭祿臣司光敢告執經

光祿勳箴

茫茫上天崇高其居設置山險畫爲防禦重垠累垓以難
不律闕爲城衛以待暴卒國有以固民以有內各保其守
永脩不敗維昔庶僚官得其人荷戈而歌中外以堅齊桓
怵惕宿衛不飭門非其人戶廢其職曹子操劍遂成其詐
軻挾匕首而衛人不寤二世妄宿敗於望夷閭樂矯搜戟
者不誰尉臣司衛敢告執維

衛尉箴

肅肅太僕車馬是供鏘鏘和鸞駕彼時龍昔在上帝巡狩
四宅王用三驅前禽是射紂作不令武王征殷檀車孔夏
四駟孔昕僕夫執儻載駢載駟我與云安我馬惟閑雖馳
雖驅匪逸匪愆昔有淫羿馳騁忘歸景公千駟而淫于齊
詩好壯馬牧於垆野輦車就牧而詩人興魯廐焚問人仲
尼原醜孟子蓋惡夫廐多肥馬而野有餓殍僕臣司駕敢

駢四

五

告執皂

太僕箴

天降五刑惟夏之績亂茲平民不回不辟昔在蚩尤爰作
淫刑延于苗民夏氏不寧穆王耄荒甫侯伊謀五刑訓天
周以阜基厥後陵遲上帝不觚周輕其制秦繁其辜五刑
紛紛靡遏靡止寇賊滿山刑者半道昔唐虞象刑天民是
全紂作炮烙墜民于淵故有國者無云何謂是則是劓無
云何害是剝是劓惟虐惟殺人莫子柰般以刑顛秦以酷
敗獄臣司理敢告執誥

廷尉箴

蕩蕩唐虞經通垓極陶陶百王天工人力畫爲上下羅條
百職人有材能寮有級差遷能授官各有攸宜主以不廢
官以不隳昔在三代二季不蠲穢德慢道署非其人人失

其材職反其官案寮荒耄國政如漫文不可武武不可文大小上下不可奪倫鴻臣司爵敢告在鄰

大鴻臚箴

巍巍帝堯欽親九族經哲宗伯禮有攸訓屬有攸籍各有育子世以不錯昔在夏時太康不恭有仍二女五子家隆晉獻悖統宋宣亂序齊桓不肩而忘其宗緒周議戒女魯喜子同高作秦祟而扶蘇被凶宗廟荒墟魂靈靡附伯臣司宗敢告執主

宗正箴

時惟大農爰司金穀自京徂荒粒民是斛肇自厥初實施惟食厥僚后稷有無遷易實均實贏惟都作程旁求衣食厥民攸生上稽二帝下閱三王什一而征爲民作常遠近貢篚百姓不忘帝王之盛咸在農殖季周爛漫而東作不勅膏腴不穫庶物並荒府藏單虛靡積靡倉陵遲衰微姬率以瘁秦收太半二世不瘳泣血之末海內無聊農民司均敢告執繇

大司農箴

實實少府奉養是供紀經九品臣子攸同海內幣帛祁祁如雲家有孝子官有忠臣共僚率舊聖則越遵民以不擾國以不煩昔在帝季癸辛之世酒池糟隄而象箸以噉至於耽樂流湏而姐妹作祟共僚不御不恢夏殷喪其國康而卒以陵遲嗜不可不察欲不可不圖未嘗失之於約常失之於奢府臣司共敢告執觚

少府箴

溫溫唐虞重龔純執經表九德張設武官以御寇賊如虎有牙如鷹有爪國以自固獸以自保牙爪蔥蔥動作宜時

用之不理實反生災秦政暴戾播其威虐亡其仁義而思其殘酷猛不可重任威不可獨行堯咨虞舜惟思是尙吾臣司金敢告執璜

執金吾箴

侃侃將作經構宮室墻以禦風宇以蔽日寒暑攸除烏鼠攸去王有宮殿民有宅居昔在帝世茅茨土階夏卑宮觀在彼溝洫桀作瑤臺紂爲璇室人力不堪而帝業不卒詩詠宣王由儉改奢觀豐上六大屋小家春秋譏刺書彼泉臺兩觀雉門而魯以不恢或作長府而閔子不仁秦作驪阿羸姓以顛故人君無云我貴稂題是遂毋云我富淫作極遊在彼墻屋而忘其國戮作臣司匠敢告執猷

將作大匠箴

幽幽山川徑塞九路盤石唐芒襲險重固國有城溝家有

駢四

七

拆拒各有攸堅民以不虞德懷其內險難其外王公設險而承以盤蓋昔在上世有殷有夏癸辛不德而設夫險阻湯武爰征而莫過莫禦作君之危不可德少而城溝伊保不可德希而城溝是依唐虞長德而四海永懷秦恢長城而天下畔乖尉臣司城敢告侍陪

城門校尉箴

茫茫大田芄芄作穀山有陁陸野有林麓夷原汗藪禽獸攸伏魚鼈以時芻蕘咸殖國以殷富民以家給昔在帝舜共田徑游弧矢是尙而射夫封豬不顧於愆卒遇後憂是以田獲三驅不可過差麀鹿攸伏不如德至衡臣司虞敢告執指

上林苑令箴

普彼坤靈侔天作則分制五服黜爲萬國乃立地官空惟

是職茫茫九州都鄙盈區綱以羣牧無以方侯烈烈雋又
翼翼王臣臣當其官官宜其人九一之政七職以均昔在
季葉班祿遺賢培克充朝而象恭滔天垂本南力匪政斯
勅流貨市寵而苞苴是鸞王路斯浮孰不相臣司土
敢告在側

司空箴

翼翼太常寔爲宗伯穆穆靈祇寢廟奕奕稱秩祀祀班乎
群神我祀既祇我絜孔錫匪愆匪忒公尸攸宜弗祈弗求
惟德之報不矯不誣庶無罪悔昔在成湯葛爲不弔棄禮
慢祖夔子不祀楚師是虜魯人躋僖臧文不悟文隳太室
桓納郤賂災降二宮用諂不祧故聖人在位無曰我貴慢
行繁祭無曰我材輕身侍巫東鄰之犧牛不如西鄰多魚
秦殞望夷隱斃鍾巫常臣司宗敢告執書

駢四

八

太常箴

皇皇聖哲允勅百工命作齋慄龍爲納言是機是密出入
朕命王之喉舌獻善宣美而讒說是折我視云明我聽云
聰載夙載夜惟允惟恭故君子在室出言如風動於民人
渙其大號而萬國平信春秋譏漏言易稱不密則失臣兌
吉其和巽吝其頰書稱其明申申厥鄰昔秦尚權詐官非
其人符璽竊發而扶蘇隕身一姦愆命七廟爲墟威福同
門牀上維宰書臣司命敢告侍隅

尚書箴

洋洋三代典禮是脩畫爲辟雍國有學校侯有泮宮各有
攸教德用不陵昔在文王經啟其軌勗于德音而思皇多
士多士作楨惟周以寧國人興讓虞芮質成公劉挹行潦
而濁亂斯清官操其業士執其經昔聖人之綏俗莫美於

施化故孔子觀夫大學而知爲王之易易大舜南面無爲而衽席平還師階級之間三苗以懷秦作無道斬決天紀漫彼王迹而坑夫術士詩書是泯家言是守俎豆不陳而顛其社稷故仲尼不對問陳而胡篋是遵原伯非學而閔子知周之不振儒臣司典敢告在賓

博士箴

崔亭伯官箴

雖不足繼武子雲而雅懿有餘

天官冢宰庶僚之率師錫有帝命虞作尉爰叶臺極安平國域制軍詰禁王旅惟式九州用綏群公咸治干戈載戢宿纏其紀上之云據下之云戴苟非其人戮我帝載昔周人思文公而召南詠甘棠昆吾隆夏伊摯盛商季世頗僻禮用不匡無曰我強莫余敢喪無曰我大輕戰好殺紂師百萬卒以不艾宰臣司馬敢告在際

駢四

九

太尉箴

天監在下仁德是興乃立司徒亂茲黎烝茫茫庶域卒土祁祁民具爾瞻四方是維乾乾夕惕靡怠靡違恪恭爾職以勤王機敬敷五教九德咸事嗇人用章黔卞是富無曰余恃忘余爾輔無曰余聖以忽執政匪用其良乃荒厥命庶績不怡疚于爾祿豐其折右而鼎覆其餽書歌股肱詩刺南山尹氏不堪國度斯憊徒臣司衆敢告執藩

司徒箴

邈矣臯陶翊唐作士設爲狂狷九刑允理如石之平卬開之清三槐九棘以質以聽罪人斯殛凶旅斯并熙又帝載旁施作明昔在仲尼哀矜聖人子罕禮刑衛人釋艱釋之其忠勲亮孝文于公哀寡定國廣門寬哉邈矣舊訓不遵

主慢臣驕虐用其民賞以崇欲刑以肆忿紂作炮烙周人滅殷夏用淫刑湯誓其軍衛鞅酷烈卒殞于秦不疑加害禍不反身嗟茲大理慎于爾官賞不可不思斷不可不虔或有忠而被害或有孝而見殘吳沉伍胥殷割比干莫遂爾情是截是刑無遂爾心以速以殛天鑒在顏無細不錄福善灾惡其劻甚速理臣思律敢告執獄

大理箴

嵇叔夜太師箴

此爲司馬氏言也若諷若惜詞多紆回

浩浩太素陽曜陰凝二儀陶化人倫肇興厥初冥昧不慮不營欲以物開患以事成犯機觸害智不求生宗長歸仁自然之情故君道自然必託賢明茫茫在昔罔或不宰赫胥旣往紹以皇義默靜無文太朴未虧萬物熙熙不夭不

駢四

十

離爰及唐虞猶篤其緒體資易簡應天順矩絺褐其裳土木其宇物或失性懼若在予疇咨熙載終禪舜禹夫統之者勞仰之者逸至人重身棄而不恤故子州稱疾石戶乘桴許由鞠躬辭長九州先王仁愛愍世憂時哀萬物之將頽然後蒞之下逮德衰大道沉淪智慧日用漸私其親懼物乖離口口孽仁利巧愈競繁禮屢陳刑教爭施天性喪眞季世陵遲繼體承資憑尊恃勢不友不師宰割天下以奉其私故君位益侈臣路生心竭智謀國不吝灰沉賞罰雖存莫勸莫禁若乃驕盈肆志阻兵擅權矜威縱虐禍蒙邱山刑本懲暴今以脅賢昔爲天下今爲一身下疾其上君猜其臣喪亂宏大多國乃殞顛故殷辛不道首綴素旗周朝敗度彘人是謀楚靈極暴乾谿潰叛晉厲殘虐樂書作難主父棄禮馘胎不宰秦皇荼毒禍流四海是以亡國繼

踵今古相承醜彼摧滅而襲其亡徵初安若山後敗如崩
臨刃振鋒悔何所增故居帝王老無日我尊慢爾德音無
日我疆肆于驕淫棄彼佞倖納此選顏諛言順耳染德生
患悠悠庶類我控我告唯賢是授何必親戚順乃造好民
實胥效治亂之原豈無昌教穆穆天子思聞其憊虛心導
人允求讜言師臣司訓政告在前

潘正叔乘輿箴

有序

彥和譏其義正詞繁信然然當晉武驕盈之時獨發讜
論故隨事指陳反復致意有序所謂意詭詞野亦其苦
心也箴貴慤而輿子雲而外與此者希矣言之有物
者皆在所取

易稱有天地然後有人倫有父子然後有君臣傳曰大者
天地其次君臣然君臣父子之道天地人倫之本未有以

駢四

十一

先之者也故天生蒸人而樹之君使司牧之將以薰羣生
之性而理萬物之情豈以寵一人之身極無量之欲如斯
而已哉夫古之爲君者無欲而至公故有茅茨土階之儉
而後之爲君有欲而自利故有瑤臺瓊室之侈無欲者天
下共推之有欲者天下共爭之推之之極雖禪代猶脫屣
爭之之極雖刼殺而不避故曰天下非一人之天下乃天
下之天下安可求而得辭而已者乎夫脩諸已而化諸人
出乎邇而見乎遠者言之謂也故人主所患莫甚於不
知其過而所美莫美於好聞其過若有君於此而曰予必
無過唯其言而莫之違斯孔子所謂其庶幾乎一言而喪
國者也蓋君子之過如日月之蝕過也人皆見之更也人
皆仰之雖以堯舜湯武之盛必有誹謗之木敢諫之鼓盤
杆之銘無諱之史所以開其邪僻而納諸正道其自維持

如此之備故箴規之興將以補過教闕然猶依違諷喻使
言之者無罪聞之者足以自誠先儒既援古義舉內外之
殊而高祖亦序六官論成敗之要義正辭約又盡善矣自
虞人箴以至于百官箴王闕則亦天子之事也尼以爲
王者膺受命之期當神器之運總萬機而撫四海簡羣才
而審所授孜孜於得人汲汲於聞過雖廷爭面折猶將所
請而求焉至於箴規諫之順者曷爲獨闕之哉是以不量
其學陋思淺因負擔之餘嘗試撰而述之不敢斥至尊之
號故以乘輿日篇蓋帝王之事至大而古今之變至衆文
繁而義詭意局而辭野將欲希企前賢髣髴崇軌譬猶其
坻之望華岱恒星之繫日月也其不逮明矣頌曰

元元遂初芒芒太始清濁同流元黃錯峙上下弗形尊卑

駢四

三

靡紀赫胥悠哉大庭尙矣皇極啓建兩儀既分彛倫永序
萬邦已紛國事明王家奉嚴君各有攸尊德用不勤義農
已降暨于夏殷或禪或傳乃質乃文太上無名下知有之
仁義不存而人歸孝慈無爲無執何欲何思忠信之薄禮
刑實滋旣譽旣畏以侮以欺作誓作盟而人始叛疑煌煌
四海藹藹萬乘匪誓焉憑左輔右弼前疑後丞一日萬機
業業兢兢夫出其言善則千里是應而莫余違亦喪邦有
徵樞機之動式以廢興殷監不遠若之何勿懲且厚味腊
毒豐屋生災辛作璇室而夏興珍臺糟工酒池象筋玉杯
厥肴伊何龍肝豹胎惟此哲婦騶爲亂階殷用喪師夏亦
不恢是以帝堯在位茅茨不翦思文日昃昧且不顯夫德
輜如毛而或舉之者鮮故湯有所懲武未盡善下世道衰
未俗化淺耽樂逸遊荒淫沈湎不式古訓載在先典匪唯

陵夷厥世用殄故曰樹君如之何將人是司牧視之猶傷
而知其寒燠故能撫之斯柔而敦之斯睦無遠不懷靡思
不服夫豈厭縱一人而玩其耳目內迷聲色外荒馳逐不
脩政事而終於顛覆昔唐氏授舜舜亦命禹受終納祖丕
承天序放桀惟湯尅殷伊武故禪代非一姓社稷無常主
四嶽三塗九州之阻彭蠡洞庭殷商之旅虞夏之隆非由
尺土而紂之百尅卒於絕緒故王者無親唯在擇人傾蓋
惟舊白首乃新望由鈞夫伊起有莘負鼎鼓刀而謀合聖
神夫豈借官左右而取介近臣蓋有國有家者莫云我聰
或此面從莫謂我智聽受未易甘言美疾慙不爲累由夷
逃寵遠於脫屣柰何人主位極則侈知人則哲惟帝所難
唐朝旣泰四族作奸周室旣隆而管蔡不虔匪我二聖孰
弭斯患若九德咸受雋又在官君非臣莫治臣非君莫安

駢四

七

故書美康哉而易貴金蘭有皇司國政告納言

張茂先女史箴

惠帝時華懼后族之
盛作女史箴以諷

極醇實是宋人所宗

茫茫造化兩儀始分散氣流形旣陶旣甄在帝庖犧肇經
天人爰始夫婦以及君臣家道以正而王猷有倫婦德尚
柔含章貞吉婉婉淑慎正位居室樊姬感莊不食鮮禽衛
女矯桓耳忘和音志厲義高而二主易心元熊攀檻馮媛
趨進夫豈無畏知成不恡班妾有辭割歡同輦夫豈不懷
防微慮遠道罔隆而不殺物無盛而不衰日中則昃月滿
則微崇猶塵積替若駭機人咸知飾其容而莫知飾其性
性之不飾或愆禮正斧之藻之克念作聖出其言善千里
應之苟違斯義同衾以疑出言如微而榮辱由茲勿謂幽
昧靈鑒無象勿謂元漠神聽無響無矜爾榮天道惡盈無

侍爾貴隆隆者墜鑒於小星戒彼攸遂比心螽斯則繁爾
類權不可以瀆寵不可以專專實生慢愛極則遷致盈必
損理有固然美者自美翩以取尤洽容求好君子所仇結
恩而絕職此之由故曰翼翼矜矜福所以興靖恭自思榮
顯所期女史司箴敢告庶姬

摯仲洽尚書令箴

初學作張華今
從藝文作摯虞

明明先王開國承家作制垂憲仰觀列耀俯令百官政用
罔僭昔舜納大麓七政以齊內成外平而風雨不迷山甫
翼周靡剛靡柔補我衮闕闡我王猷王猷允塞而四海咸
休雖聖雖明必資良材無曰我智官不任能發言如絲其
出成綸千里之應樞機在身三季道缺天綱縱替既無老
成改舊法制法制不循不長厥裔尚臣司臺敢告侍衛

張孟陽劔閣銘

駢四

十四

雖曰銘其體實箴也亦是步趨子雲

巖巖梁山積石峩峩遠屬荆衡近綴岷嶓南通邛夔北達
褒斜狹過彭碣高踰嵩華惟蜀之門作固作鎮是曰劔閣
壁立千仞窮地之險極路之峻世濁則逆道清斯順閉由
往漢開自有晉秦得百二并吞諸侯齊得十二田生獻壽
矧茲狹隘土之外區一人荷戟萬夫趙趙形勝之地匪親
勿居昔在武侯中流而喜山河之固見屈吳起興實在德
險亦難恃洞庭孟門二國不祀自古迄今天命匪易憑阻
作昏鮮不敗績公孫旣滅劉氏銜璧覆車之軌無或重跡
勒銘山阿敢告梁益

王子淵皇太子箴

有序

臣聞教化爰始詠歌不足政俗旣移風雅斯變伏惟皇明
御宇功均造物改文爲質斲雕成素皇太子游雷居震明

兩作離春夏干戈秋冬羽箭叔譽慙五稱之對師曠降四馬之恩竊以太史官箴虞書所誠永樹芳烈丞相所以垂文深覩安危太傅以之陳訓敢自斯義獻箴云爾

天生蒸民司牧斯樹咸熙庶績式昭王度惠民垂統元良繼體麗正離暉惟機天啓令問令望聞詩聞禮從曰撫軍守曰監國秋坊通夢春宮養德桓榮獻書荀攸觀則元子爲士齒卿命秩朝服寢門迴車作室正陽君位喬枝父道臣子所崇忠孝爲寶勿謂居尊禍福無門勿謂親賢王道無偏無爲慮始無爲事先損之又損全之亦全無往不復無平不陂美疢甘言鮮不爲累則哲惟難知人未易居室爲善分陰無棄亡保其存危安其位神聽不惑天妖斯忌文昌著于前星桓鬯由于守器庶僚司箴敢告闕寺

駢四

五

合河蕭氏
別梓家譜

駢體文鈔卷五

謚哀策類

揚子雲元后誄

叙禪新處絕徵致

新室文母太后崩天下哀痛號哭涕泗思慕功德咸上詞誄之銘曰

惟我有新室文母聖明皇太后姓出黃帝西陵昌意實生高陽純德虞帝孝聞四方登陟帝位禪受伊唐爰初胙土陳田至王營相厥宇渡河濟旁沙麓之靈太陰之精天生聖姿豫有禪禎作合于漢配元生成孝順皇姑承家尚莊內則純被後烈不光肇初配元天命是將兆徵顯見新都黃龍漢成既終胤嗣匪生哀帝承祚惟離典經尙是言異大命俄顛厥年天隕大終不盈文母覽之于載不傾博選大智新都宰衡明聖作佐與圖國艱以度厄運徵立中山

駢五

一

庶其可濟博采淑女備其姪娣覲禮高禩祈廟嗣繼靡格匪天靡動匪地穆穆明明昭事上帝宏漢祖考夙夜匪懈興滅繼絕博立侯王親睦庶族昭穆序明帝致友屬靡有遺荒咸被祚慶冀以金火赤仍有央金當爲全央當爲央勉進大聖上下兼該羣祥衆瑞正我黃來火德將滅惟后于斯天之所壞人不敢支哀平天折百姓分離社宗之愆終其不全天命有託譴在于前屬遭不造榮極而遷皇天眷命黃虞之孫歷世運移屬在聖新代于漢劉受祚于天漢祖承命赤傳于黃攝帝受禪立爲真皇允受厥中以安黎衆漢廟黜廢移定安公皇皇靈祖惟若孔臧降茲珪璧命服有常爲新帝母鴻德不忘欽德伊何奉命是行菲薄服食神祇是崇尊不虛統惟祗惟庸隆循人敬先民是從承天祇家允恭虔恪豐阜庶卉旅力不射恤民于留不皇詭作別計

十邑國之是度還奉于此以處貧薄罷苑置縣築里作宅
以處貧窮哀此婺獨起常盈倉五十萬斛爲諸生儲以勸
好學志在黎元是勞是勤春巡瀟澗秋臻黃山夏撫鄠杜
冬卹涇樊大射饗飲飛羽之門綴肴肴幼不拘婦人刑女
歸家以育貞信元冥季冬搜狩上蘭寅賓出日東秩賜谷
鳴鳩拂羽戴勝降桑蠶於繭館躬筐執曲帥導羣妾咸循
蠶簇分繭理絲女工是勅遐邇蒙祉中外禔福自京逮海
靡不仰德成類存生秉天地經無物不理無人不寧尊號
文母與新有成世奉長壽靡有墮傾著德太常注諸旒旌
嗚呼哀哉以昭鴻名享國六十殂落而崩四海傷懷踴踊
拊心若喪考妣遏密八音嗚呼哀哉萬方不勝德被海表
彌流魂精去此昭昭就彼冥冥忽兮不見超兮西征旣作
下宮不復故庭爰緘伊銘嗚呼哀哉

駢五

曹子建文帝誄

文心雕龍云陳思叨名體實繁緩文皇誄末旨言自陳
其乖甚矣予謂文之繁緩誠如所譏使彥和見江謝之
篇更不知作何揮詆至其旨言自陳則思王以同氣之
親積譏讒之憤述情切至溢于自然正可以副言哀之
本致破庸冗之常態誄必四言羌無前典固不得援此
爲例亦不宜遽目爲乖也

惟黃初七年五月七日大行皇帝崩嗚呼哀哉於時天震
地駭崩山隕霜陽精薄景五緯錯行百姓吁嗟萬國悲傷
若喪考妣思過慕唐擗踊郊垵仰想窮蒼僉曰何辜早世
隕喪嗚呼哀哉悲夫大行忽焉光滅永棄萬民雲住雨絕
承問慌惚惛惛哽咽袖鋒抽刃欲自僵斃追慕三良甘心
同穴感彼南風惟以鬱滯終於偕沒指景自誓考諸先紀

尋之哲言生若浮寄惟德可論朝聞夕逝孔志所存皇雖
殪歿天祿永延何以述德表之素旂何以詠功宣之管絃
乃作誄曰

皓皓太素兩儀始分中和產物肇有人倫爰暨三皇實秉
道真降逮五帝繼以懿純三代製作踵武立勳季嗣不維
綱漏於秦崩樂滅學儒坑禮焚二世而殲漢氏乃因弗求
古訓羸政是遵王綱帝典間爾無聞末光幽昧道究運遷
乾坤回厯簡聖授賢乃眷大行屬以黎元龍飛啟祚合契
主元正行定紀改號革年明明赫赫受命於天風偃物化
德以禮宣祥惟聖質岐嶷幼齒研幾六典學不過庭潛心
無妄亢志清真才秀藻朗如玉之瑩聽察無響瞻睹未形
其剛如金其貞如瓊如冰之潔如砥之平爵功無重戮違
無輕心鏡萬機鑒照下情思良股肱嘉昔伊呂搜揚側陋

駢五

三

舉湯代禹拔才巖穴取士蓬戶唯德是縈弗拘禰祖宅土
之中道義是圖弗營厥險六合是虞齊契其檢導下以純
恢拓規矩克紹前人科條品制褒貶以因乘般之轅行夏
之辰金根黃屋翠葆龍鱗綈冕崇麗衡紉維新尊肅禮容
矚之若神方牧妙舉欽於恤民虎將荷節鎮彼四隣朱旗
所勦九壤被震疇克不若孰敢不臣縣旌海表萬里無塵
虜備凶徹烏殪江岷權若涸魚乾腊矯肅慎納貢越裳
效珍條支絕域獻款內賓德濟先王功侔太古上靈降瑞
黃初俶祐河龍洛龜陵波遊下平均應繩神鸞翔舞數莢
階除系風扇暑皓獸素禽飛走郊野神鐘寶鼎形自舊土
雲英甘露澍塗被宇靈芝冒沼朱華蔭渚回回凱風祁祁
甘雨稼穡豐登我稷我黍家佩惠君戶蒙慈父圖致太和
洽德全義將登泰山先皇作儷鐫石紀勳兼錄衆瑞方隆

封禪歸功天地賓禮百靈勲命視規望祭四嶽燎封奉崇
肅於南郊宗祀上帝三牲旣供夏禘秋嘗元侯侂祭獻璧
奉璋鸞輿幽藹龍旂太常爰迄太廟鐘鼓錚錚頌德詠功
八佾鏘鏘皇祖旣饗烈考來享神具醉止降茲福祥天地
震蕩大行康之三辰暗昧大行光之皇紘絕維大行綱之
神器莫統大行當之禮樂廢弛大行張之仁義陸沉大行
揚之潛龍隱鳳大行翔之疏狄遐康大行匡之在位七載
元功仍舉將永太和絕迹三五宜作物師長爲神主壽終
金石等算東父如何奄息摧身后土俾我鶯鶯靡瞻靡顧
嗟嗟皇穹胡寧忍務嗚呼哀哉明鑒吉凶體達存亡深垂
典制申之嗣皇聖上虔奉是順是將乃創元宇基於首陽
擬迹穀林追堯纂唐合山同陵不樹不疆塗車芻靈珠玉
靡藏百神警侍來賓幽堂耕禽田獸望魂之翔於是俟大

駢五

四

隧之致功兮練元辰之淑禎潛華體於梓宮兮馮正殿以
居靈顧皇嗣之號咷兮存臨者之悲聲悼晏駕之旣往兮
感容車之速征浮飛魂於輕霄兮就黃墟以藏形背三光
之昭晰兮歸元宅之冥冥嗟一往之不返兮痛闕闔之長
扃咨遠臣之耿耿兮承凶諱以怛驚心孤絕而靡告兮紛
流涕而交頸思恩榮以橫奔兮闕闕塞之嶢崢顧衰絰以
輕舉兮念關防之我嬰欲高飛而遙憇兮憚天綱之遠經
遙投骨於山足兮報恩養於下庭慨拊心而自悼兮懼施
重而命輕嗟微軀之是效兮甘九死而忘生幾司命之役
籍兮先黃髮而隕零天蓋高而察卑兮冀神明於我聽獨
鬱伊而莫告兮追顧景而憐形奏斯文以寫思兮結翰墨
以敷誠嗚呼哀哉

曹子建平陽懿公主誄

含意抑揚而授辭婉委此之謂不苟其模容寫貌則安仁金鹿等篇所自出也

俯振地紀仰錯天文悲風激興霜焱雪雰凋蘭天蕙良幹以汎於惟懿主瑛瑤其質協策應期含英秀出岐嶷之姿實朗實極在生十旬察人識物儀同聖表聲協音律驪眉識往俛瞳知來求顏必笑和音則咳阿保接手持御充傍常在襁褓不停幃牀專愛一宮取玩聖皇何圖奄忽罹天之殃魂神遷移精爽翱翔號之不應聽之不聆帝用吁嗟嗚呼哀哉憐爾早沒不逮陰光改封大郡惟帝舊疆建土開家邑移蕃王琨珮惟鮮朱紱斯煌國號既崇哀爾孤獨配爾君子華宗貴族爵以列侯銀艾優渥成禮於宮靈輶交轂生雖異室歿同山嶽爰構元宮玉石交連朱房皓壁皓曜電鮮飾終備衛法生象存長埏繕修神闈掩扉二楹並降雙魂孰依人誰不歿憐爾尚微阿保激摧上聖傷悲城闕之詩以日踰歲况我愛子神光長滅扃關一閉曷其復晰

蘇孝山和帝誄

天王徂登率土奄傷如何昊穹奪我聖皇恩德累代乃作銘章其辭曰

忝惟大行配天建德陶元二化風流萬國立我蒸民宜此儀則厥初生民三五作綱載籍之盛著於虞唐恭惟大行爰同其光自昔何爲欽明允塞恭惟大行天覆地載無爲而治冠斯征代征代崎嶇諸夏擅命爰茲發號民樂其政奄有萬國民臣咸秩大孝備矣闕宮有恤由昔姜嫄祖妣之室本枝百世神契惟一彌留不豫道揚末命勞謙有終實惟其性衣不制新犀玉遠屣履和而行威稜上古洪澤

滂流茂化沾溥不慙少留民斯何怙獻歛成雲涕泣成雨
昊天不弔喪我慈父

潘安仁世祖武帝詩

尙有疎通之美

粵若稽古誕受休命作我晉室赫赫文皇配天並日大行
龍飛創制改物沉恩汪濊流澤洋溢上齊七政下綏萬邦
四門穆穆五典克從惟清緝熙於變時雍愛盡事親教加
百姓于喪過哀在祭餘敬后蠶冕服躬躬籍粢盛大代畢奏
九功咸詠行敦醇樸思貫元妙蒞政端位臨朝光曜胄子
入學辟雍宗禮國老恂恂貴遊濟濟莫孝匪子莫悌匪弟
化自外明訓法以禮饗彼吳楚稱亂三代世歷五僞年幾
百載邊垂虔劉王化阻闕羽檄星馳鉦鼓日戒帝御羣帥
奉辭奮旅腹心庭爭爪牙疑沮天監獨照聖策乃舉朝服

駢五

六

濟江止戈曜武野無交兵役不淹月偕號歸命稽顙晉闕
邪界蠻流傍納百越表閭旌善德音爰發虞人獻箴周書
垂誥酒懼其彘獸戒其冒於我大行縱心所好動不踰矩
性與道奧厭厭酣飲樂不辨顏桓桓振旅田無遊盤我德
如風民應如藹靡不夙夜無敢宴安務農望歲時或不稔
小心翼翼恤民以甚御坐不怡撤膳賑廩西流垂精南金
抑施永言孝思天經地義問誰贊事英彥髦士問誰翼侍
博物君子潛明神鑒從衆屈已道濟羣生爲而不恃先天
弗違後天降時萬物熙熙懷而慕思黼黻縉紳不謀同辭
巖巖岱宗想望翠旗恭惟大行功成不居議寢封禪心棲
沖虛策告不足大平有餘七十二君方之蔑如思樂天德
等壽嵩華如何寢疾背世登遐遷幸梓宮孤我邗家龜筮
旣襲吉日爲良永指太極寧神峻陽羣后躡踴長訣鞞鞞

望靈斯顧豈伊不傷家無遠邇那靡小大四海供職同軌
畢會茫茫原野亭亭素蓋縞輅解駕白虎弭旒龍輶卽定
元闔載扁如天斯崩如地斯傾哀哀庶寮紫瑩自愍彼蒼
者天胡寧斯忍聖君不返我獨旋軫

潘安仁皇女誄

厥初在鞠玉質華繁元髮修曜蛾眉連娟清顙橫流明眸
朗鮮迎時夙智望歲能言亦旣免懷提攜紫庭聰惠機警
授色應聲壘壘其進好日之經辭令容止閑於幼齡倚倚
春蘭柔條含芳落英彫矣從風飄揚紗好弱媛窈窕淑良
孰是人斯而離斯殃靈殞旣祖次此暴廬披覽遺物徘徊
舊居手澤未改領賦如初孤竟遐逝存亡永殊嗚呼哀哉
左九嬪萬年公主誄

昔蒲衣早智周晉夙成咸以岐嶷名存典經猗歟公主在

駢五

七

幼尅哲方德比齒有邈先烈何德之盛而年或闕何華之
繁而實不結兩墜風逝形影長滅赫赫京室河洛所經陰
精發曜降茲淑靈篤生公主誕膺休禎秀生紫微日暉月
明紅顏鬢髮金質玉形句據太平御覽一百五十四引補旣睨艷姿徽音
孔昭盼倩其媚婉曼其嬌寵玩軒陛如瓊如瑤雖則弱齒
雙德兼苞五福所集聞之先民積善鍾慶祐德輔仁宜終
淑美光暉日新云何降戾景命不振睚眦榮曜英蕤始芳
何辜于天猥遇降霜熒熒稚魂飄飄遐翔於戲何幸痛茲
不福生而何晚歿而何速酷矣皇靈謬哉司祿嗚呼哀哉
日月載馳白露凝結自主薨徂奄離時節吉凶乖邈存亡
異制將遷幽都潛神永翳嗚呼公主魂豈是綬岌岌靈輜
駿駟駢駟挽僮齊唱悲音激摧上女獻欲高風增哀一日
不見採蕭作歌況我公主任滅體訛精靈遷逝幽此中阿

言思言念涕淚滂沱嗚呼哀哉

晉成帝哀策

宸極寥廓聖靈遐之哀備物之虛在痛永存之無期乃命史官述德寄辭其辭曰

五德代興素靈啓曜離光疊暉三辰重照明明我皇含貞挺妙元秀夙達履德罔違鳳棲遐邇神宇疑夷文明外潤仁簡內綏舉無遺中鑒無幽微韻隆汾陽道侔垂拱靜恭清穆冥功日用臺臺神軌同天攸縱爰有陽九紀綱中替姦豎肆逆牢羅失衛升降艱難協應神契靈祚旣保顯揚天命霧霧朝晞兩儀開鏡詔詒阿衡虛己絕正九功潛流七德將表方振宏羅陵威電掃芟蕩神衢一我王道昊天不弔降茲大悔天傾其儀地覆其載大業未究神爽遷背哀貫三靈痛流萬代爰初不豫大漸在躬啓手歸全神氣

駢五

八

夷沖凝哉達識體正履終袞龍旣襲玉容斯幽登醪虛設觴爵靡酬墳牘莫啓聖迹誰修冥冥我皇神焉何遊撫膺遐叫逆涕交流三策告期將歸陵墟陸殞羽翼庭納龍輿玉輪動運錫鸞鳴衢旂旒徘徊六驥踟躕輕雲陰輦流風翼車哀哀同軌唯唯輓夫長號永慕泣涕漣泫大塊獨運終歸其始我后永往寧神千祀悠悠上天煢煢惟己渺然靡憑廓焉無恃目範令儀徽音在耳

王恂晉武帝哀策

同軌畢至百司胥亞法物夕陳輻輳鳳駕親執饋奠長號永夜懼鼓刻之過盡哀良辰之莫借悲宮宇之寥廓痛聖儀之幽化夫至德無名固理絕稱謂然祝史陳辭亦臣子所貴寄窮情於翰墨庶遺塵之髣髴其辭曰

唯皇作極五德迭允康實復夏武亦降晉臺豐大宗希東

其韻鏡之者元撫之者順於穆皇考嗣徽絕軌前聖後哲
契合一揆心去其伐行遺其美廢華任誠捨荃存旨惟深
通志羣方咸秩惟幾成務能事斯畢未若我皇至則不疾
恢恢天網疏而莫失居有以虛宰多以少簡則可從靜則
不擾信及豚魚澤被億兆湛然司契坐一八表園陵旣衛
威靈赫赫子來旣構寢廟奕奕武曰止戈或不極役文教
聿修有恥且格迹有遠邇感無高深道之所被改邑革音
皓獸馴苑素羽棲林殊柯通理異蒂同根方融元液陶鑄
斯民雲韶俟奏比屋思淳積祐莫應天罰奄臻太山頽構
洪瀆竭津何殃之甚何酷之殷自罹旻凶二氣代變霜繁
廣除風迴高殿帷幙空張看徂虛薦極聽無聞詳視罔見
人神道殊吉凶有禮龜策參謀埏埴告啓史臣考吉警者
在陞攀援忪忪惟兄及弟龍輿肅以引邁前驪紛以抗旒

駢五

九

城闕儼以整列馳道亘以通修悲平昔之所幸豈斯路之
復由輓哀唱以翼衡駟悲鳴而顧軻違華宇之晰晰卽永
夜之悠悠奉靈輓而長訣緬終天而莫收訢穹蒼以叫躡
洞五內其若抽儻性命之可贖甘人百於山丘茫茫大運
靡始不終哲王遺世貴在道融昭哉我皇萬代流風良史
式述德音永隆

謝希逸宋孝武帝哀策文

應門洞望馳道南除叢塗已撤鬱鬯將虛哀子嗣皇帝擗
標池絳周遑旌軫攀七緯之崩淪慟三靈之徂盡百神慕
而行雲沉萬國哀而素霜霽衣冠緬邈弓劍不追敢緝謳
頌髣髴希夷其辭曰

樞電皇根月瑤國緒脣裔丹陵蟬聯華渚二后在天大行
纂武克睿克聖重規襲矩昭昭金式明明玉溫望雲其遠

就日其尊雨零露湛冬暖春暄馨芳納麓道昭賓門上德
無稱至功不器悵悵四始優遊六位綴響黃深猶言瓊秘
悠哉梁踐彤焉汾肆敬業開寓離經作翰鴻起荆河鸞遊
楚漢泗濱霑明江區承煥陝左清郊棠陰虛館地維不紐
乾綱弛機叢庭薄蝕紫路流飛泣血派浹顧瞻川沂孝貫
樞極義震寰圍誓鉞皇郊詔師牧甸七景締華五雲卷煽
雪怨園邑掃恥瀛縣啓聖宸蓋集寶龍見王室多故國步
方蹇淮濟裂冠江荆毀冕東楚亂常西華啓躔動算揮圖
爰戡爰剪浹宙斯澄綿區咸鏡修風曉逸德星夕映溥露
飛甘舒雲結慶禎被動植信泊翔泳軼禮克宣墜章必構
方堂饗極圓流肆胄南聳郊宮北清靈罔瑤軒春藉翠華
冬狩經緯窮文克定盡武部上呈祥介丘載竹在盈念冲
成功弗處榮鏡中世鳥奕前古睿業初遠鴻化方亭丹雲

駢五

十

承日素景騰星玉几去襲綴衣在庭辭重陽之昭昭降大
夜之冥冥氣質炎涼史詔龜筮文物空嚴鑿和虛衛動蜃
輅之逶迤顧璧羽之容裔出國門而分天地向幽途而異
身世龍旌鬱而青槐遠驚葭亂而白楊翳觀初霜之變條
聽秋風之下帶橋山絙雲穀林虧日輦道結寒松庭盡密
芝蓋迫軫上驤眷轡萬寓肅其北較靈阿聞其深隘南維
有時傾離光不常鏡騰英聲與茂實方流華於舞詠

謝希逸宋孝武宣貴妃誄

淒麗之文江鮑特絕施之典冊每覺輕儇其於妃姬尚
不嫌耳 此與文通齊武帝誄入後俱不作四言與哀
策之體相亂矣不當援陳思爲辭也

惟大明六年夏四月壬子宣貴妃薨律谷罷煖龍鄉輟曉
照車去魏聯城辭趙皇帝痛掖殿之旣闋悼泉途之已宮

巡步檐而臨蕙路集重陽而望椒風嗚呼哀哉天寵方隆
王姬下姻肅雍揆景陟妃爰臻國軫喪淑之傷家疑質庇
之怨敢撰德於旂旒庶圖芳於鐘萬其辭曰

元邱烟煴瑤臺降芬高唐渫雨巫山鬱雲誕發蘭儀光啟
玉度望月方娥瞻星比婺毓德素里棲景宸輒處麗絺綌
出懋蘋蘩修詩賁道稱圖照言翼訓如幄贊軌堯門綢繆
史館容與經闈陳風緝藻臨象分微游藝殫數撫律窮機
躊躇冬愛怳悵秋暉展如之華實邦之媛敬勤顯陽肅恭
崇憲奉榮維約承慈以遜逮下延和臨朋違怨祚靈集祉
慶藹迎祥皇允瘳式帝女金相聯躡齊穎接萼均芳以蕃
以牧燭代輝梁視朔書氛觀臺告稷八頌扇和六祈鞞滲
衡總滅容翬翟毀祚掩綵瑤光收華紫禁嗚呼哀哉帷軒
夕改輶輅晨遷離宮天邃別殿雲懸靈衣虛襲組帳空烟

駢五

七

巾見餘軸匣有遺絃嗚呼哀哉移氣朔兮變羅紉白露凝
兮歲將闌庭樹驚兮中帷響金釭燼兮玉座寒純孝辨其
俱毀共氣摧其同樂仰昊天之莫報怨凱風之徒攀茫昧
與善寂寥餘慶喪過乎哀毀實滅性世覆沖華國虛淵令
嗚呼哀哉題湊旣肅龜筮旣辰階撤兩奠庭引雙轡維慕
維愛曰子曰身慟皇情於客物崩列辟於上旻崇徽章而
出寰甸照殊策而去城闕嗚呼哀哉經建春而右轉循閭
闔而逕度旌委鬱於飛飛龍委遲於步步鏘楚挽於槐風
喝邊簫於松霧涉姑繇而環廻望樂池而顧慕嗚呼哀哉
晨輻解鳳曉蓋俄金山庭寢日隧路抽陰重扃闕兮燈已
黯中泉寂兮此夜深銷神躬於壤末散靈魄於天濤響乘
氣兮蘭馭風德有遠兮聲無窮嗚呼哀哉

謝希逸皇太子妃哀策文

榴凝桂酒庭肅龍輻風吹國輅雲起郊門皇帝傷總辮之
掩綵悼副禕之滅華行光旣宴長河又斜顧而言曰璇瑤
有毀郁烈無涇翦素裁簡授之史臣其辭曰

霍岫虧天灣流疑漢祥發桐珪慶昭金筭毓景帝里飛芳
戚開秘儀施谷升音集灌月晷幾望娣袂維良釋障春宮
承飾少陽五葉衍藻四訓拙光威蕤蕙振婉瓊瓊相清徽
就遠役沔方搏臨華罷翠當暉收蘭複殿生響長廡結寒
節移虛饋氣變容衣中庭草暖階上螢飛傷紫里第痛溢
朝闌霜侵燭味風密唯淒驚葭夕轉龍駘夜嘒筵旣訣兮
莫旣徹背青闕兮去神閨旌掩鬱而還泛蓋逶遲而顧低
素紉歛維華解馭山隧恒陰松阿不曙離天渥兮就銷
沉委白日兮卽冥暮菊有秀兮蘅有芬德方遠兮馨彌樹
顏延年宋文皇帝元皇后哀策文

駢五

三

惟元嘉十七年七月二十六日大行皇后崩于顯陽殿粵
九月二十六日將遷座於長寧陵禮也龍輶纒綉容翟結
駢皇塗照烈神路幽嚴皇帝親臨祖饋躬瞻宵載餘遺儀
於組旒淪徂音乎珩珮悲繡筵之移御痛翟綸之重晦降
輿客位撤奠殯階乃命史臣累德述懷其辭曰

倫昭儷升有物有憑圓精初燦方祇始疑昭哉世族祥發
慶膺祕儀景肖圖光玉繩昌暉在陰柔明將進率禮蹈和
稱詩納順爰自待年金聲夙振亦既有行素章增絢象服
是加言觀維則俾我王風始基嬪德惠問川流芳猷淵塞
方江泳漢動謠南國伊昔不造鴻化中微用集寶命仰陟
天機釋位公宮登曜紫闈欽若皇始允勉前徽孝達寧親
敬行宗祀進思才淑傍綜圖史發音在詠動容成紀盡政
穆宣房樂韶理坤則潤成星朝潤德之所屆惟深必測

下節震騰上清眺側有來斯雍無思不極謂道輔仁司化
莫晰象物方臻眠祲告診太和既融收華委世蘭殿長陰
椒塗弛衛嗚呼哀哉戒涼在埽埽秋卽夢霜夜流唱曉月
升魄八神警引五輅遷跡噉噉儲嗣哀哀列辟灑零玉墀
雨泗丹掖撫存悼亡感今懷昔嗚呼哀哉南肯園門北首
山園僕人按節服馬顧園遙酸紫葢眇泣素軒滅綵清都
夷體壽原邑野淪藹戎夏悲謹來芳可述往駕弗援嗚呼
哀哉

王仲寶高帝哀策文

降階執禮泣血纏心感容臺之罷御哀恭館之不臨仰神
儀而邈絕視區物而增陰俾茲良史敬修舊則敢圖鴻規
式揚至德其辭曰

靈源遙裔肇惟商邱聖功寧夏賢識歸周我皇踵武超冠

駢五

三

前猷美風允迪德音孔修月準敷仁日精表孝則地均和
體天合炤外宏三至內隆七教水祀將傾乾維晦象韋弁
長龔鼓磬屬響聲化已淪政刑遂往國圖靡緝民規載爽
康世以德撥亂資武威以雷霆澗以風雨六術允昭四義
克舉自東徂北遐方卽敘功被河濟化隆江漢帝謨仰式
王維佇幹改步藩屏來登翼贊綢繆總章因循陽館昔在
保衡君違斯政爰茲博陸亦鑒靈命效昏以忠登明資敬
義煥金石功昭舞詠蠢爾荆漢悖亂人經謀連樞禁兵接
神垌禦姦以愆禦宄以刑獻捷宗寢飲至王庭政教雲行
嶽猷天造山鑑紫璇苑茂朱草玉檢騰暉金繩薦寶天鏡
旣穆地維旣肅遐邇壹體表裏禔福乃眷斯民昧旦杼軸
興文偃武繼禹舊服所尚惟簡所寶惟賢居尊彌約無善
不延膠章載緝風軌克宣上洞清儀下達元泉聽覽閑日

應物餘景怡慮以文棲心以靜鴻章晨映徽言夕永迹庶
區服情深箕穎萬寓籟和百祠受職梁甫欣儀雲亭望式
輔德伊何奄捐民極嵩岳長傾宸暉斯尺機炤惟寂達鑿
靡傷慎終敬始知微知彰立言垂範玉潤金相瞻仰遺式
哀結流霜旋玉軼之皦鏡動雲旗之逶迤振哀筵于八極
響清蹕于咸池顧應掖而稍遠視機衡而長離風遲遲而
懷暮日憺惜其若垂感衣冠于喬岳追弓劍之在斯悼丁
年之薄祐訴窮心于兩儀

江文通齊太祖誄

華縉已極而敘次嚴整唐人遞相掇襲富或過之鮮彩
終不及也

日月鬱華風雲黯色傷動業微悲匝璇極嗚呼哀哉粵夏
四月辛卯將遷座於泰安陵龍鑾既整羽衛以陳深酸舊

駢五

古

物掩咽故臣嗣皇帝永訣丹掖叫號青幄攀神光之一絕
勵遠邇之何期弓劍有慕纂德寫辭僉曰若稽古聖璿圖
靈鏡星樞發祥電光啟命誕惟弱齡惠示聰情如金如璧
爰秀爰英於鑠冠歲騰華流藝允文允武克明克睿聿尚
登學巖道尊師宣敷五禮優游六詩上疏舊滯旁鏡前疑
才罄艷采筆盡麗辭在友斯悌于親伊孝儉恭共色夷阻
一貌遊情踴矩縱心蹈教鄉術式慕州閭是效業優登任
先哲攸懋矧乃寥廓淵規邃構官府天地舟輿宇宙龍靜
鳳戢斂奇揜秀昔在帝劉王室放命狡焉僞誕晦朔陵正
鋒車北軼燼火南盛太祖時乘爰茲發迹塞井滅勳夷竈
龕敵賞鏤王圖功狴帝册乃厲中葉天未斂難兵百哀曹
禍十楚漢吳地前崩越壤首亂街號耀盛火列金斷聚甲
如陵獻俘爲觀北楚偏強曾未屈膝雲屯破野魚麗亘日

廟勇既消國圖方賈神册天開雄畧世出凶劍鱗沉醜戈
羽逸隻騎不還跨輪無匹厥庸戾止離珮委他榮鬱閭闔
寵重山河皇靈有文朝采方藹頻煩金紐左右緹蓋吡戎
肅禁參輦侍旆譽馥區中道夢岷外河濟國險淮泗邦塵
要藩重設匪賢則親亦既推輒擁土庇民聲稜絕俗威懾
殊鄰宋主陵遐紫殿遏密話言之詔詒在英粹寅亮大寶
敷綸妙秘世識機鑿物宗淵懿無負匪鍊靡奧不泊三階
既馴五精惟至彭蠡九江地盡襟製亦有劉範衣纓是絕
躍馬山岫泛舟河滢編鏞星流紅旗電結鳩翼競扇豺牙
爭礪禍纏紫禁兵交丹衛瑤卮若旂金辰如綴朝野頌儀
咸歸上德實賴至公寫家提國懷險實泰危亡必克機筮
朝旦功定曠黑妙物更配具章重則深居擣外遙棲緜默
高秩方臻元禮有序王曰念哉輝寵是與職褒宮閣任卷

駢五

文武飾華麗貂縈金疊組宏猷溢俗曾芬冠古憬彼朱方
亦惟宗秩陰圖食昴潛謀貫日征輪未誓偏旗銜律原燎
既寂世囂伊謐爰崇爰貴以望以實雁縣告靜象郡無虞
杳鬱遠域清麗瓊都國填岷負朝委事虛實翳哲相嶽曜
神居功美既損道富去益再紐契訓重匡禹迹方同范張
濯情汾射散簪山郊解珮松石頰霞拂朝蒼煙惜夕韻屬
元經恩流金液靈厭霸德少帝告豐滅慈滅養抵仁抵信
枉獄炎鑪淫刑霜刃刳忠翦義焚稚斲櫬慄慄萬岷曰怨
曰震妖蜺將崩災裂裂吳蒼况乃鼎國資滌資匡臨朝聞命
遏昏立綱事繇毗漢義締翼商旣綏地職亦懋天工權輿
典緯俾作司空黼黻珞戈祐宇升庸徒賜先袞爰永渥沖
實曰驃騎卷迹辭功寰寓睦政畿甸綸風沈氏滔天悖逆
舊楚氣蹂黃池志轢栢舉裂禮紊度毀經棄序黑騎黔山

朱旗頽渚短兵相接長鋌爲羣顛如海岸矗似蒸雲台乃
霧激離則霰分荆國旣軼郢縣方焚袁劉二戾焱馳焯發
聯謀制外儲兵襲內釁激瓊殿勢崩金闕志乘元壘圖矯
秘鉞鴻妖逝星高禔乘月惟時諸侯上脫下競圖服滄瀟
實綴仁聖輝耀國靈導揚主命曾規近晰深暮遠鏡左轡
朱楨表裏斯定七德節歌九功粹詠乃陟上鉞寵文方輝
誕錫有秩綵吹旌旗贊政瑤光翊教太微實曰太傅爰登
相國緝民以禮綜祇以德景福咸溱芳猷允塞羽泳式造
紘縣是則金湯無險軌書攸同迴迴寵迹窈窕睿功寶珪
黛壤俾王於東絢冊是敷懋物旣崇設業設簾丹懸碧鏞
於穆顯相黎元時邕冰州炎徼來獻其琛雁海龍關亦柔
好音梁鼉棧鼉越險浮深遠戎皆覲上靈畢臨山吐石青
野降寶露瑞芝麗草珍柯爛樹人崩俗締元緯幽數睠此

駢五

六

妙德跂我王度筵滯炎旻旣變至公萎蕤媯華文祖受終
大宋有訓高擢萬邦容豫慶雲遊衍南風正服寶位圓光
玉繩御繡懷古負黼夙興丘礙必靜淵漪咸澄助辰有作
黜膈其義矜卑廣慈合賤兼愛綴機剗賊輕章削罰迹去
繁彥情歸素一軒靡龍刻楹無丹密越賤申椒楚輟靈橘
陵寢起邑池藻誰縣遙館罕御離房空薦惇教路宮淹神
正殿斟酌信義左右律禮瑩彼皇維華茲國體胄業旣樹
璧流方啟漢求金岫吳實銅塹寧若睿德讓駟却劍實才
爲貴唯功是念火職咸允雲官亦熙旣臯方益匪櫻伊夔
無缺巡風寧竣辯詩玉燭調文元英最節乘山呈瑞航海
歸闕不曠景册靡空歲月受緯機衡兼甄詩史孫韓各辨
莊墨異理昭政往藹洗鑠前軌逍遙星斗徒倚涼雲春颺
方舞秋鴻初分式諸式詠載績載文邈哉我后淪泳賢聖

罄品作號盡物歸政蒼黎汰歡元靈刷慶永哉嘉祚方寅
景命締詳有文颺沛將掩理昧人誼道懸世險夏略遺圖
忌華徇儉文閭陳几翌明告漸蜺衛鬪食日月朏精劓在
乘輿宇折宙傾履纏鸞掖悲越紫扇去璇臺之照襲珠殞
之冥嗚呼哀哉帷宮低景輦路熾光惻柏門之黯黯泣松
帳之茫茫上宮擗而詔御咽羣后慕而侍衛傷攢靈旣儼
遠日以篋鬱鬯旣奠龍爵方撤素月夜橫翠煙曉結攏虛
金而下欵吟空簫而增絕嗚呼哀哉於是颯天駕而從綺
輿漉神行而撫文輦傍建春而南蹕徑宜陽而東踐尙蓋
蓋而未散乍眇默而不轉睇于乘之共啜盼萬騎之相泣
悲魏后之戀譙測漢主之懷沛辭金陵之萼莪降雲陽之
杳藹風奇響而駢軒煙異色而低旆怨街邑之綵驂弔原
野之縞蓋挽夫愴而征馬凝痛縈盈其如帶嗚呼哀哉複

駢五

七

林油雲重山減日御房清凄神路冥謐昭徒肅燾幽祗疎
躡攀光灑慟臨泉澍泗瓌座長嚴雕宮永闕寂帳寂兮寂
已遠夜釭夜兮夜何邃嗚呼哀哉

結語甚率而俗又不收
合作誄之意皆非體也

謝元暉齊敬皇后哀策文

惟永泰元年九月朔日敬皇后梓宮啓自先塋將耐於某
陵其日至尊親奉奠某皇帝乃使兼太尉某設祖于行宮
禮也翠帟舒阜元堂啓扉俎徹三獻筵卷六衣哀子嗣皇
帝懷蚤衛而延首想鷺輅而撫心痛椒塗之先廓哀長信
之莫臨身隔兩赴時無二展旋詔左言光敷聖善其辭曰
帝唐遠胄御龍遙緒在秦作劉在漢開楚肇惟淑聖克柔
克令清漢表靈霄沙厲慶爰定厥祥徽音允穆光華沼沚
榮曜中谷敬始絃綖教先種稔睿問川流神襟蘭郁先德
韜光君道方被于佐求賢所謁無詖顧史宏式陳詩展義

厚下曰仁藏往伊智十亂斯俟四教罔忒思媚諸姑貽我
慈訓自公官遠被南國軒曜懷光素舒佇德閔予不祐
寂遠清廟虛歸嗚呼哀哉帝遷明命民神胥悅乾景外臨
陰儀內缺空悲故劍徒嗟金穴璋瓚奚獻禕禕綸罔設嗚呼
哀哉馮相告禘宸駕長往貽厥遠圖末命是獎懷豐沛之
綱繆兮背神京之宏微陋蒼梧之不從兮遵鮒禹以同壤
嗚呼哀哉陳象設於園寢兮映輿鉞於松楸望承明而不
入兮度清洛而南遊繼池綉於通軌兮接龍帷於造舟迴
塘寂其已莫兮東川澹而不流嗚呼哀哉藉闕宮之遠烈
兮聞纘女之遐慶始協德於蘋蘩兮終配祀而表命慕方
纏於賜衣兮哀且隆於撫鏡思寒泉之罔極兮託彤管於
遺詠嗚呼哀哉

駢五

文

王元禮昭明太子哀冊文

蜃輅俄軒龍驂跼步羽翮前驅雲旂北御皇帝哀繼明之
寢耀痛嗣德之殂芳御武帳而懷慟臨甲觀而增傷式稽
令典載揚鴻烈詔撰德于旌旒永傳徽于舞綴其辭曰
式載明兩寔惟少陽旣稱上嗣且曰元良儀天比峻儼景
騰光奉祀延福守器傳芳睿哲膺期旦暮斯在外宏莊肅
內含和愷識洞機深量苞瀛海立德不器至功弗宰寬綽
居心溫恭成性循時孝友率由嚴敬咸有種德惠和齊聖
三善遞宣萬國同慶軒緯掩精陰羲弛位纏哀在疚殷憂
銜恤孺泣無時蔬餼不溢禫遵踰月哀號未畢實惟監撫
亦嗣郊禋問安肅肅視饒恂恂金華玉璫元駟璠輪隆家
幹國主祭安民光奉成務萬機是理矜慎庶獄勤恤關市
誠存隱惻容無愠喜殷勤博施綱繆恩紀爰初敬業離經

斷句莫爵崇師卑躬待傳宰資導習匪勞審諭博學是可
時敏斯務辨究空微思探幾蹟馳神圖緯研精爰畫沉吟
典禮優游方冊饜飮膏腴含咀肴核括囊流略包舉藝文
遍該細素殫極邱墳騰帙充積儒墨區分瞻河闡訓望魯
揚芬吟詠性靈豈惟薄伎屬辭約婉緣情綺靡字無點竄
筆不停紙壯思泉流清章雲委總覽時才網羅英茂學窮
優洽辭歸繁富或擅談叢或稱文囿四友推德七子慙秀
望苑招賢華池愛客託乘同舟連輿接席摛文挾藻飛觴
汎擘恩隆置醴賞逾賜璧徽風遐被盛業日新仁器非重
德輜易遵澤流兆庶福降百神四方慕義天下歸仁雲物
告徵稜沴褰象星輝恒耀山頽朽壤靈儀上賓德音長往
具僚無蔭諮承安仰嗚呼哀哉皇情悼愍切心纏痛允嗣
長號耐萼增慟慕結親游悲動氓衆憂若殄邦想同折棟

駢五

九

嗚呼哀哉首夏司開麥秋紀節容衛徒警菁華萎絕書幌
空張談筵罷設虛饋饜饈孤燈翳翳嗚呼哀哉簡辰請日
筮合龜貞幽埏夙啓元宮獻成武枝齊列文物增明昔游
漳滏賓從無聲今歸郊郭徒御相驚嗚呼哀哉背絳闕以
遠徂蘿青門而徐轉指馳道而詎前望國都而不踐陵修
坂之威夷邇原平之悠邇驥蹠足以酸嘶挽悽鏘而流泣
嗚呼哀哉混哀音于簫簫變愁容于天日雖夏木之森陰
返寒林之蕭瑟旣將反而復疑如有求而遂失謂天地其
無心遽永潛於容質嗚呼哀哉卽元宮之冥漠安神寢之
清闕傳馨華于懋典觀德業于徽謚懸忠貞于日月潘鴻
名于天地惟小臣之紀言是含毫而無媿嗚呼哀哉

沈初明陳武帝哀策文

望三靈而標目躋九地而崩心哭仍凡之將撤慟祖鬯之

虛斟黃屋褻而白日掩紫極涵而浮雲陰其辭曰

悠悠媯水鬱鬱虬墟惟帝之系在唐作虞正卿之後握此
靈符彤雲布族祥星結樞負茲大鏡未拾遺珠爰初發跡
斬地鞠旅大定番禺載載海渚承繫而運席卷中流王室
如燬乃合諸侯負鎬誓眾釋位同謀俱登涿鹿實斷蚩尤
道濟一匡功歸四履爰總百官訓於天子儻來有運事非
獲已翠龜負字赤雀銜書謳歌適夏禮樂遷虞負辰正位
升壇受圖二儀協序五緯同符門歌麟趾室詠騶虞奉常
定日太卜蠲時升中備物方告雍熙天甘玉露地秀金芝
休禎未答靈貺徒欺吏求穆卜詔絕良鑒義躋失御天街
穉蹕夏采升榮宮車晏出洞闈移凶充庭罷吉閉官省之
窮燈去昭昭之遊日歸大暮之不暘降幽宮而長畢巫咸
筮告容成戒期文衛如在葆鐸相悲去畢陌而東顧望橋
山而路遲臣攀龍而尙在魂過沛而何之侍低昂之靈燾
奉寂寂之空帷銅雀沒於修松平陵隱於深柏節叢鼓之
哀音燎燿火於通夕薤露落而暮日寒元霜凝而堊草白
銘功德於旂常被徽音於鐘石迴天儀於清廟附祖考而
來格播茂實與英聲鬱氛氤於宗祏

駢五

三

合炯爾氏
駢輝家謂

漢景帝後六年令二千石修職詔

雕文刻鏤傷農事者也錦繡纂組害女紅者也農事傷則饑之本也女紅害則寒之原也夫饑寒並至而能亡爲非者寡矣朕親耕后親桑以奉宗廟粢盛祭服爲天下先不受獻減太官省徭賦欲天下務農蠶素有蓄積以備災害彊毋攘弱衆毋暴寡老者耆以壽終幼孤得遂長今歲或不登民食頗寡其咎安在或詐僞爲吏吏以貨賂爲市漁奪百姓侵牟萬民縣丞長吏也奸法與盜盜甚無謂也其令二千石各修其職不事官職耗亂者丞相以聞請其罪布告天下使明知朕意

漢武帝元朔元年議不舉孝廉者罪詔

駢六

一

祖義褒德錄賢勸善刑暴五帝三王所繇昌也朕夙興夜寐嘉與宇內之士臻于斯路故旅耆老復孝敬選豪俊講文學稽參政事祈進民心深詔執事興廉舉孝庶幾成風紹休聖緒夫十室之邑必有忠信三人並行厥有我師今或至闔郡而不薦一人是化不下究而積行之君子壅於上聞也二千石官長紀綱人倫將何以佐朕燭幽隱勸元元勵蒸庶崇鄉黨之訓哉且進賢受上賞蔽賢蒙顯戮古之道也其與中二千石禮官博士議不舉孝廉者罪

漢武帝元狩二年報李廣詔

將軍者國之爪牙也司馬法曰登車不式遭喪不服振旅撫師以征不服率三軍之心同戰士之力故怒形則千里竦威振則萬物伏是以名聲暴於夷貉威稜愾乎鄰國夫報忿除害捐殘去殺朕之所圖於將軍也若廼免冠徒跣

稽顙請罪豈朕之指哉將軍其帥師東轅彌節白檀以臨
右北平盛秋

後漢光武帝報臧宮馬武詔

黃石公記曰柔能制剛弱能制彊柔者德也剛者賊也弱者仁之助也彊者怨之歸也故曰有德之君以所樂樂人無德之君以所樂樂身樂人者其樂長樂身者不久而亡舍近謀遠者勞而無功舍遠謀近者逸而有終逸政多忠臣勞政多亂人故曰務廣地者荒務廣德者彊有其有者安貪人有者殘殘滅之政雖成必敗今國無善政災變不息百姓驚惶人不自保而復欲遠事邊外乎孔子曰吾恐季孫之憂不在顓臾且北狄尙彊而屯田警備傳聞之事恒多失實誠能舉天下之半以滅大寇豈非至願苟非其時不如息人

駢六

二

明帝申明科禁詔

昔曾閔奉親竭歡致養仲尼葬子有棺無槨喪貴致哀禮存寧儉今百姓送終之制競爲奢靡生者無擔石之儲而財力盡於墳土伏臘無糟糠而牲牢兼於一奠糜破積世之業以供終朝之費子孫饑寒絕命於此豈祖考之意哉又車服制度恣極耳目田荒不耕游食者衆有司其申明科禁宜於今者宣下郡國

章帝建初七年禘祭詔

祖考來格明哲之祀予末小子質又菲薄仰惟先帝烝烝之情前修禘祭以盡孝敬朕得識昭穆之序寄遠祖之思今年大禮復舉加以先帝之坐悲傷感懷樂以迎來哀以送往雖祭亡如在而空虛不知所裁庶或饗之豈亡克慎肅雍之臣辟公之相皆助朕之依依今賜公錢四十萬卿

半之百官執事各有差

章帝元和二年詔三公

方春生養萬物孳甲宜助萌陽以育時物其令有司罪非
殊死且勿案驗及吏人條書相告不得聽受冀息事寧人
敬奉天氣立秋如故夫俗吏矯飾外貌似是而非揆之人
事則悅耳論之陰陽則傷化朕甚厭之甚苦之安靜之吏
悃悃無華日計不足月計有餘如襄城令劉方吏人同聲
謂之不煩雖未有他異斯亦殆近之矣間勅二千石各尙
寬平而今富姦行賂於下貪吏枉法於上使有罪不論而
無過被刑甚大逆也夫以苛爲察以刻爲明以輕爲德以
重爲威四者或興則下有怨心吾詔書數下冠蓋接道而
吏不加理人或失職其咎安勉思舊令稱朕意焉

章帝元和二年祠明堂詔

駢六

三

朕巡狩岱宗崇望山川告祠明堂以章先勳其二王之後
先聖之亂東后蕃衛伯父伯兄仲叔季弟幼子童孫百僚
從臣宗室衆子要荒四裔沙漠之北葱嶺之西冒彰之類
跋涉懸度陵踐阻絕駿奔郊時咸來助祭祖宗功德延及
朕躬予一人空虛多疚纂承尊明盥洗享薦慙愧祇慄詩
不云乎君子如祉亂庶遄已厯數旣從靈耀著明亦欲與
士大夫同心自新其大赦天下

和帝永元十二年恤民詔

比年不登百姓虛賈京師去冬無宿雪今春無澍雨黎民
流離困於道路朕痛心疾首靡知所濟瞻仰昊天何辜今
人三公朕之腹心而未獲承天安民之策數詔有司務擇
良吏今猶不改競爲苛暴侵愁小民以求虛名委任下吏
假執行邪是以令下而姦生禁至而詐起巧法析律飾文

增辭貨行於言罪成乎手朕甚病焉公卿不思助明好惡將何以救其咎罰咎罰既至復令災及小民若上下同心庶或有瘳

鄧太后延平元年察吏劾

天降災戾應政而至間者郡國或有水災妨害秋稼朝廷惟咎憂惶悼懼而郡國欲獲豐穰虛飾之譽遂覆蔽災害多張墾田不揣流亡競增戶口掩匿盜賊令姦惡無懲署用非次選舉乖宜貪苛慘毒延及平民刺史垂頭塞耳阿私下比不畏於天不愧於人假貸之恩不可數恃自今以後將糾其罰二千石長吏其各實覈所傷害爲除田租芻

豪
後至策丞相諸葛亮詔

此以詔爲檄辭嚴義正誓誥遺風

駢六

四

朕聞天地之道福仁而禍淫善積者昌惡積者喪古今常數也是以湯武修德而王桀紂極暴而亡曩者漢祚中微網漏凶慝董卓造難震蕩京畿曹操階禍竊執天衡殘剝海內懷無君之心子丕孤豎敢尋亂階盜據神器更姓改物世濟其凶當此之時皇極幽昧天下無主則我帝命隕越於下昭烈皇帝體明獻之德光演文武應乾坤之運出身平難經營四方人鬼同謀百姓與能兆民欣戴奉順符識建位易號丕承天緒補弊興衰存復祖業膺誕皇綱不墜於地萬國未靜早世遐殂朕以幼冲繼統鴻基未習保傅之訓而嬰祖宗之重六合壅否社稷不建永惟所以念在匡救光載前緒未有攸濟朕甚懼焉是以夙興夜寐不敢自逸每從菲薄以益國用勸分務穡以阜民財授方任能以參其聽斷私降意以養將士欲奮劍長驅指討凶逆

朱旗未舉而不復隕喪斯所謂不然我薪而自焚也殘類
餘醜又支天禍恣睢河洛阻兵未弭諸葛丞相宏毅忠壯
忘身憂國先帝託以天下以勗朕躬今授之以旄鉞之重
付之以專命之權統領步騎二十萬衆董督元戎龔行天
伐除患寧亂克復舊都在此行也昔項籍總一彊衆跨州
兼土所務者大然卒敗垓下死於東城宗族如焚爲笑千
載皆不以義陵上虐下故也今賊效尤天人所怨奉時宜
速庶憑爰精祖宗威靈相助之福所向必克吳王孫權同
恤災患潛軍合謀掎角其後涼州諸國王各遣月支康居
胡侯支富康植等二十餘人請受節度大軍北出便欲率
將兵馬奮戈先驅天命旣集人事又至師貞勢并必無敵
矣夫王者之兵有征無戰尊而且義莫敢抗也故鳴條之
役軍不血刃牧野之師商人倒戈今捨靡首路其所經至

駢六

五

亦不欲窮兵極武有能棄邪從正簞食壺漿以迎王師者
國有常典封寵大小各有品限及魏之宗族支葉中外有
能規利害審逆順之數來詣降者皆原除之昔輔果絕親
於智氏而蒙全宗之福微子去殷項伯歸漢皆受茅土之
慶此前世之明驗也若其沉迷不反獎勵亂人不式王命
戮及妻孥罔有攸救廣宣恩威貸其元帥弔其殘民他如
詔書律令丞相其露布天下使稱朕意焉

魏明帝賜彭城王據璽書

制詔彭城王有司奏王遣司馬董和齋珠玉來到京師中
尚方多作禁物交通工官出入近署踰侈非度慢令違制
繩王以法朕用愜然不寧於心王以懿親之重處藩輔之
位典籍日陳於前勤誦不輟於側加雅素奉修恭肅敬慎
務在蹈道孜孜不衰豈忘率意正身考終厥行哉若然小

疵或謬於細人忽不覺悟以斯爲失耳書云惟聖罔念作狂惟狂克念作聖古人垂誥乃至於此故君子思心無斯須遠道焉嘗慮所以累德者而去之則德明矣開心所以爲塞者而通之則心夷矣慎行所以爲尤者而修之則行全矣三者王之所能備也今詔有司宥王削縣二千戶以彰八柄與奪之法昔羲文作易著休復之語仲尼論行旣過能改王其改行芟昭斯義率意無怠

宋文帝元嘉二十六年駕幸丹徒詔

朕違北京二十餘載雖云密邇瞻途莫從今因四表無塵時和歲稔復獲拜奉舊塋展罔極之思饗讜故老申追遠之懷固以義兼於桑梓情加於過沛永言慷慨感慰實深宜聿宣仁惠覃被率土其大赦天下復丹徒縣僑舊今歲租布之半行所經縣蠲田租之半二千石官長並勤勞王

駢六

六

務宜有沾錫登城三戰及大將戰亡墜沒之家老病單弱者普加贍卹遣使巡行百姓問所疾苦孤老鰥寡六疾不能自存者人賜穀五斛

宋孝武帝孝建元年詔

首食尙農經邦本務貢士察行寧朝常道內難甫康政訓未洽衣食有仍耗之弊選造無觀國之美昔衛文勤民高宗恭默卒能收賢巖穴大殷季年朕每側席疚懷無忘鑒寐凡諸守蒞親民之官可詳申舊條勸盡地利力田善著者在所具以名聞褒甄之科精爲其格四方秀孝非才勿舉獻答允值卽就銓擢若止無可採猶賜除署若有不堪酬奉虛竊榮薦遣還田里加以禁錮尙書百官之元本庶績之樞機丞郎列曹局司有在而頃事無巨細悉歸令僕

非所以成構

也

糾覈勤惰嚴施賞罰

宋孝武帝大明七年告岳詔

江漢楚望咸秩周禮九疑於盛唐祀蓬萊於渤海皆前
載流訓列聖遺式霍山是曰南嶽實維國鎮韞靈呈瑞肇
光宋道朕駐蹕於野有事岐陽瞻睇風雲徘徊以想可遣
使奠祭

宋孝武帝大明七年校獵歷陽詔

朕受天慶命十一年於茲矣憑七廟之靈獲上帝之力禮
橫四海威震八荒方巡三湘而奠衡嶽次九河而檢岱
今恢覽功成省風畿表觀民六合蒐校長洲騰沙飛礫平
嶽盪海藪晉合序饒鉦協節獻鬯如禮饁獸傾郊敬舉王
公之觴廣納士民之壽八風循通卿雲叢聚盡天馨瑞率
宇竭歡思散太極之泉以福無方之外可大赦天下行幸
通

駢六

七

所無出今歲租布其逋租餘債勿復收賜民爵一級女子
百戶牛酒刺守邑宰及民夫從蒐者普加洽資

宋明帝泰始三年禁采供不時詔

古者衡虞置制蠶蛾不收川澤產育登器進御所以繁阜
民財養遂生德頃商販逐未競早爭新折未實之果收豪
家之利籠非膳之翼爲童戲之資豈所以還風尚本捐華
務實宜修道布仁以革斯蠹自今鱗介羽毛肴核衆品非
時月可採器味所須可一皆禁斷嚴爲科制

梁武帝設謗木肺石二函詔

商俗甫移遺風尚熾下不上達由來遠矣升中馭索增其
凜然可於公車府謗木肺石傍各置一函若肉食莫言山
阿欲有橫議投謗木函若從我江漢功在可策犀兕徒弊
龍虬方縣次身才高妙墮屣莫通懷傅呂之術抱屈賈之

歎其理有瞭然受困包圍或大政侵小豪門陵賤四民已窮九重莫達若欲自申並可投肺石函

梁武帝罷鳳凰脚書詔

朕君臨南面道風蓋闕嘉祥時至爲媿已多假令巢伴軒閣集同昌戶猶當顧循寡德推而不居況於名實頓爽自欺耳目一日元會大樂奏鳳凰脚書伎至乃舍人受書升殿跪奏誠復興乎前代率由自遠內省懷慙彌與事篤可罷之

梁元帝次建業詔

夫爰始居亳不廢先王之都受命于周無改舊邦之頌項戎旃旣息關柝無警去魯興嘆有感宵分過沛殞涕實勞夕寐仍以瀟湘作亂庸蜀阻兵命將授律指期克定今入表又清四郊無壘宜從青蓋之典言歸白水之鄉江湘委

駢六

八

輸方船連舳巴峽舟艦精甲百萬先次建業行實京師然後六軍造征九旂揚旆拜謁瑩陵修復宗社王者詳依舊典以時宣力

陳後主勸農詔

躬推爲勸義顯前經力農見賞事昭往詰斯乃國儲是資民命攸屬豐儉隆替靡不由之夫入賦自古輸藁惟舊沃饒貴於千金磽确至於三易腴瘠旣異盈縮不同詐僞日興簿書歲改稻田使者著自西京不實峻刑聞諸東漢老農懼於祇應俗吏因而侮文輟耒成羣游手爲伍永言妨蠹良可太息今陽和在節膏澤潤下宜展春耨以望秋坻其有新闢墉畎進墾蒿萊廣袤勿得度量征租悉皆停免私業久廢咸許占作公田荒縱亦隨肄勤儻良守教耕淳民載酒有茲督課議以賞擢外可爲格班下使明稱朕意

焉

陳後主太建十四年詔

昔睿后宰民哲王御寓惟德稱汪濊明能普燭猶復紆已
乞言降情訪道高咨岳牧下聽輿臺故能政若神明事無
悔吝朕纂承丕緒思隆大業常懼九重已邃四聰未廣欲
聽昌言不疲痺足若逢廷折無憚批鱗而口柔之辭儻聞
於在位腹誹之意或隱於具僚非所以宏理至公緝熙帝
載者也內外卿士文武衆司若有智周政術心練治體救
民俗之疾苦辯禁網之疎密者各進忠讜無所隱諱朕將
虛已聽受擇善而行庶深鑒物情匡我王度

陳後主追封吳明徹詔

李陵矢竭不免請降于禁水漲猶且生獲固知用兵上術
世罕其人故侍中司空南平郡公明徹爰初躡足迄届元

駢六

九

戎百戰百勝之奇決機決死之勇斯亦侔於古焉及拓定
淮淝長驅彭沛覆勍寇如舉毛掃銳師同沃雪風威懼於
異放功効著於同文方欲息駕陰山解鞍瀚海旣而師出
已老數亦終奇不就結纒之功無辭入禡之屈望封嶠之
爲易冀平翟之非難雖志在屈伸而奄中霜露埋恨絕域
甚可嗟傷斯事已往累逢肆赦凡厥罪戾皆蒙洒濯獨此
孤魂未霑寬惠遂使爵土湮沒饗醑無主棄毀錄用宜在
茲辰可追封邵陵縣開國侯食邑一千戶以其息惠覺爲

嗣

隋高祖報李穆詔

朕初臨寓內方藉嘉猷養老乞言實懷虛想七十致仕本
爲常人至若呂尚以期頤佐周張蒼以華皓相漢高才命
世不拘恒禮遲得此心留情規訓公年旣耆舊筋力難煩

今勒所司敬蠲朝集如有大事須共謀謨別遣侍臣就第
詢訪

隋高祖賜高麗王湯璽書

朕受天命愛育率土委王海隅宣揚朝化欲使圓首方足
各遂其心王每遣使人歲常朝貢雖稱藩附誠節未盡王
既人臣須同朕德而乃驅逼鞅鞅固禁契丹諸藩頓顙爲
我臣妾忿善人之慕義何毒害之情深乎太府工人其數
不少王必須之自可聞奏昔年潛行財貨利動小人私將
弩手逃竄下國豈非修理兵器意欲不臧恐有外聞故爲
盜竊時命使者撫慰王藩本欲問彼人情教彼政術王乃
坐之空館嚴加防守使其閉目塞耳永無聞見有何陰惡
弗欲人知禁制官司畏其訪察又數遣馬騎殺害邊人屢
騁姦謀動作邪說心在不賓朕於蒼生悉如赤子賜王土

駢六

字授王官爵深恩殊澤彰著遐邇王專懷不信恒自猜疑
常遣使人密覘消息純臣之義豈若是也蓋當由朕訓導
不明王之愆違一已寬恕今日已後必須改革守藩臣之
節奉朝正之典自化爾藩勿忤他國則長享福貴實稱朕
心彼之一方雖地狹人少然普天之下皆爲朕臣今若黜
王不可虛置終須更選官屬就彼安撫王若酒心易行率
由憲章卽是朕之良臣何勞別遣才彥也昔帝王作法仁
信爲先有善必賞有惡必罰四海之內具聞朕旨王若無
罪朕忽加兵自餘藩國謂朕何也王必虛心納朕此意慎
勿疑惑更懷異圖往者陳叔寶代在江陰殘害人庶驚動
我烽候抄掠我邊境朕前後誡勅經歷十年彼則恃長江
之險聚一隅之衆悖狂驕傲不從朕言故命將出師除彼
凶逆來往不盈旬月兵騎不過數千厯代逋寇一朝清蕩

遐邇又安人神胥悅間王歎恨獨致悲傷黜陟幽明有司
是職罪王不爲陳滅賞王不爲陳存樂禍好亂何爲爾也
王謂遼水之廣何如長江高麗之人多少陳國朕若不存
含育責王前愆命一將軍何待多力慙懃曉示許王自新
耳宜得朕懷自求多福

駢六

士

合河蕭氏
卯輝家謹

漢武帝元狩六年封齊王策

策命之文取式經訓二漢以還遂成絕軌

嗚呼小子閱受茲青社朕承天序惟稽古建爾國家封於東土世爲漢蕃輔嗚呼念哉其朕之詔惟命不于常人之好德克明顯光義之不圖俾君子怠悉爾心允執其中天祿永終厥有愆不臧乃凶于乃國而害于爾躬嗚呼保國又民可不敬與王其戒之

漢武帝元狩六年封燕王策

嗚呼小子旦受茲元社建爾國家封于北土世爲漢藩輔嗚呼薰鬻氏虐老獸心以姦巧邊吐朕命將率徂征厥罪萬夫長千夫長三十有二帥降旗奔師薰鬻徙域北州以綏悉爾心毋作怨毋作業德毋慶迺備非教士不得從微

駢七

王其戒之

漢武帝元狩六年封廣陵王策

嗚呼小子胥受茲赤社建爾國家封于南土世爲漢蕃輔古人有言曰大江之南五湖之間其人輕心揚州保疆三代要服不及以正嗚呼悉爾心祇祇兢兢迺惠迺順毋桐好逸毋邇宵人惟法惟則書云臣不作福不作威靡有後羞王其戒之

漢宣帝神爵三年丞相初拜策

惟神爵三年十月甲子丞相受詔之官皇帝延登親詔之曰君其進虛受朕言朕鬱于大道獲保宗廟兢兢師師夙夜思過失不遑康寧晝思百官未能綏於戲丞相其帥意毋怠以補朕缺於戲羣卿大夫百官慎哉不曷于職厥有常刑往悉乃心和裕開賢俾之反本又民廣風一俗靡諱

朕躬天下之衆受制于朕丞相可不慎歟於戲君其誠之
五鳳二年御史大夫初拜策

惟五鳳三年正月乙巳御史大夫之官皇帝延登親詔之
曰御史大夫其進虛受朕言朕鬱于大道獲保宗廟兢兢
師師夙夜思已失不遑康寧晝思百姓未能綏於戲御史
大夫其帥意盡心以補朕缺於戲九卿羣大夫百官慎哉
不勗于厥職厥有常辟往悉乃心和裕開賢俾賢能反本
又民靡諱朕躬天下之衆受制于朕以法爲命可不慎歟
於戲御史大夫其誠之

元壽二年丞相遣郡國計吏勅

元壽二年以丞相爲大司徒郡國守丞長史上計事竟發
遣君侯出坐庭上親問百姓所疾苦所計掾史各一大音
聲者上荅又讀五條詔書勅讀畢罷遣勅曰詔書殿下禁

駢七

二

吏無苛暴丞長史歸告二千石順民所疾苦急去殘賊審
擇良吏無任苛刻治獄決訟務得其中明詔憂百姓困于
衣食二千石帥勸農桑思稱厚恩有以賑贍之無煩擾奪
民時公卿以下務飭儉恪今俗奢參過制度日以益甚二
千石務以身帥有以化之民冗食者請論以法養視疾病
致醫藥務治之詔書無飾厨傳增養食至今未變或更尤
過度甚不稱歸告二千石務省約如法且案不改者長吏
以聞官寺鄉亭漏敗垣牆墮壞治所無辨護者不稱任先
自劾不應法歸告二千石勿聽

御史大夫遣郡國計吏勅

御史大夫勅上計丞長史曰詔書殿下布告郡國臣下承
宣無狀多不究下有缺文百姓不蒙恩被化守丞長史到郡與

二千石同力爲民興利除害務有以安之稱詔書郡國有

茂才不顯者言土殘民貪汗煩擾之吏百姓所苦務勿任
用方察不稱者刑罰務于得中惡惡止其身選舉下有民
侈過度務有以化之問今歲善惡孰與往年對上問今年
盜賊孰與往年得無有羣輩大賊對上

陳孔璋爲袁紹王烏丸版文

使持節大將軍督幽青并領冀州牧邠鄉侯紹承制詔遼
東屬國率眾王頒下烏丸遼西率眾王蹋頓右北平率眾
王汗盧維乃祖慕義遷善欵塞內附北捍獫狁東拒濊貊
世守北陲爲百姓保障雖時侵犯王略命將徂征厥罪率
不旋時悔愆變改方之外夷最又聰惠者也始有千夫長
百夫長以相統領用能悉乃心克有勲力於國家稍受王
侯之命自我王室多故公孫瓚作難殘夷厥土之君以侮
天慢主是以四海之內並執于戈以衛社稷三王奮氣裔

駢七

三

士忿姦憂國控弦與漢兵爲表裏誠甚忠孝朝所嘉焉然
而虎兕長蛇相隨塞路王官爵命否而無聞夫有勲不賞
俾勤者怠今遣行謁者楊林齋單于璽綬車服以對爾勞
其各綏靜部落教以謹慎無使作凶作慝世復爾祀位長
爲百蠻長厥有咎有不臧者民於爾祿而喪於乃庸可不
勉乎烏桓單于都護部眾左右單于受其節度他如故事
潘元茂冊魏公九錫文

九錫禪詔類相重襲逾襲逾濫稍錄之以備體

制詔使持節丞相領冀州牧武平侯朕以不德少遭閔凶
越在西土遷於唐衛當此之時若綴旒然宗廟乏祀社稷
無位羣凶覬覦分裂諸夏一人尺土朕無獲焉卽我高祖
之命將墜於地朕用夙興夜寐震悼于厥心曰惟祖惟父
股肱先正其孰恤朕躬乃誘天衷誕育丞相保乂我皇家

宏濟于艱難朕實賴之今將授君典禮其敬聽朕命昔者董卓初興國難羣后釋位以謀王室君則攝進首起戎行此君之忠於本朝也後及黃巾反易天常侵我三州延於平民君又討之剪除其迹以寧東夏此又君之功也韓暹楊奉專用威命又賴君勲尅黜其難遂建許都造其京畿設官兆祀不失舊物天地鬼神於是獲又此又君之功也袁術僭逆肆於淮南懼憚君靈用丕顯謀蕪陽之役橋蕤授首稜威南厲術以殞潰此又君之功也迴戈東指呂布就戮乘軒將返張揚沮鬻睦固伏罪張繡稽伏此又君之功也袁紹逆常謀危社稷憑恃其衆稱兵內侮當此之時王師寡弱天下寒心莫有固志君執大節精貫白日奮其威怒運諸神策致屈官渡大殲醜類俾我國家拯於危墜此又君之功也濟師洪河拓定泗州袁譚高幹成梟其首

駢七

四

海盜奔逆黑山順軌此又君之功也烏丸三種崇亂二世袁尚因之逼據塞北束馬懸車一征而滅此又君之功也劉表背誕不供貢職王師首路威風先逝百城入郡交臂屈膝此又君之功也馬超成宜同惡相濟擯據河潼求逞所欲殄之渭南獻馘萬計遂定邊城撫和戎狄此又君之功也鮮卑丁令重譯而至單于白屋請吏帥職此又君之功也君有定天下之功重以明德班敘海內宣美風俗勞勩勤教恤慎刑獄吏無苛政民不回慝敦崇帝族援繼絕世舊德前功罔不成秩雖伊尹格于皇天周公光于四海方之蔑如也朕聞先王並建明德胙之以土分之以民崇其寵章備其禮物所以蕃衛王室左右厥世也其在周成管蔡不靖懲難念功乃使邵康公錫齊太公履東至於海西至於河南至於穆陵北至於無棣五侯九伯實得征之

世昨太師以表東海爰及襄王亦有楚人不供王職又命
晉文登爲侯伯錫以二輅虎賁鉄鉞鉅鬯弓矢大啓南陽
世作盟主故周室之不壞繫二國是賴今君稱丕顯德明
保朕躬奉答天命道揚宏烈綏爰九域罔不率俾功高乎
伊周而賞卑乎齊晉朕甚憇焉朕以眇身託於兆民之上
永思厥艱若涉淵水非君攸濟朕無任焉今以冀州之河
東河內魏郡趙國中山鉅鹿常山安平甘陵平原凡十郡
封君爲魏公使使持節御史大夫慮授君印綬冊書金虎
符第一至第五竹使符第一至第十錫君元土苴以白茅
爰契爾龜用建家社昔在周室畢公毛公入爲卿佐周召
師保出爲二伯外內之任君實宜之其以丞相領冀州牧
如故今更下傳璽肅將朕命以允華夏其上故傳武平侯
印綬今又加君九錫其敬聽後命以君經緯禮律爲民軌

駢七

五

儀使安職業無或遷志是用錫君大輅戎輅各一元牡二
駟君勸分務本齋民昏作粟帛滯積大業惟興是用錫君
衮冕之服赤舄副焉君敦尚謙讓俾民興行少長有禮上
下咸和是用錫君軒懸之樂六佾之舞君翼宣風化爰發
四方遠人回面華夏充實是用錫君朱戶以居君研其明
哲思帝所難官才任賢羣善必舉是用錫君納陛以登君
秉國之均正色處中繼毫之惡靡不抑退是用錫君虎賁
之士三百人君糾虔天刑章厥有罪犯關干紀莫不誅殛
是以錫君鉄鉞各一君龍驤虎視旁眺八維掩討逆節折
衝四海是用錫君彤弓一彤矢百旅弓十茲矢千君以温
恭爲基孝友爲德明允篤誠感乎朕思是用錫君鉅鬯一
卣珪瓚副焉魏國置丞相以下羣卿百僚皆如漢初諸王
之制君往欽哉敬服朕命簡恤爾衆時亮庶功用終爾顯

德對揚我高祖之休命

徐孝穆陳公九錫文

大哉乾元資日月以貞觀至哉坤元憑山川以載物故惟天爲大陽配者欽明惟王建國翼輔者齊聖是以文武之佐禘谿蘊其玉璣堯舜之臣溟河鏤其金版況乎體得一之鴻姿寧陽九之危厄拯橫流於碣石撲燎火於崑岑驅馭於韋彭跨蹀於秦晉神功行而靡用聖道運而無名者乎今將授公典策其敬聽朕命日者昊天不弔鍾亂於我國家網漏吞舟強胡內聶茫茫宇宙慄慄黎元方足圖顛萬不遺一太清否亢橋山之痛已溲大寶屯如平陽之禍相繼上宰膺運康救兆民鞠旅於滇池之南揚旌於桂嶺之北懸三光於已墜謚四海於羣飛屠猊兪於中原斲鯨鯢於濛汜蕩寧上國光啓中興此則公之大造於皇家者也

駢七

六

也旣而天未悔禍夷醜薦臻南夏崩騰西京蕩覆羣胡孔熾藉亂乘間推納藩枝盜假神器冢司昏撓旁引寇讎旣見貶於桐宮方謀危於漢閣皇運已殆何殊贅旒中國搖然非徒如綏公赫然投袂匡救本朝復莒齊都平戎王室朕所以還膺寶歷重履宸居挹建武之風猷歌宣王之雅頌此又公之再造於皇家者也公應務之初登庸惟始三川五嶺莫不窺臨銀洞珠官所在寧謐孫盧肇躐越貂爲災番部帖危勢將淪殄公赤旗所指妖壘洞開白羽纔搗兜徒紛潰非其神武久喪南藩此又公之功也大同之末邊政不修李賁狂迷竊我交愛敢稱大號驕恣甚於尉佗據有連州雄豪熾於梁碩公英謨神算電掃風行馳御樓船直跨滄海新昌典澈備歷艱難蘇歷嘉寧盡爲京觀三山獠洞八角蠻隴悉矣水寓之鄉悠哉火山之國馬援之

所不居陶璜之所未開莫不懼我王靈爭朝邊候歸琛天
尉獻狀鴻臚此又公之功也自寇虜陵江宮闈幽辱公枕
戈嘗膽提劔撫心氣涌青霄神飛紫闥而番禺連率本自
諸夷言得其朋是懷同惡公仗此忠誠乘機勦定執浦令
而豐鼓平新野而據鞍此又公之功也世道初艱方隅多
難勦門桀黠作亂衝疑兵切池隍羆兼夷獠公以國盜邊
警知無不爲恤是同盟誅其醜類莫不魚驚鳥散面縛頭
懸南土黔黎重保蘇息此又公之功也長驅嶺嶠夢想京
畿緣道酋豪遞爲榛梗路養渠率全據大都蓄聚逮捕方
謀阻亂百樓不戰雲梯之所未窺萬弩齊張高輶之所非
敵公龍驤虎步嘯吒風雲山靡堅城野無強陣清妖氛於
瀘石滅沴氣於雩都此又公之功也遷仕凶慝屯據大皇
乞活類馬騰之軍流民多杜弼之衆推鋒轉鬪自北徂南

駢七

七

頻歲稽誅實惟勁虜公坐揮三略遙制六奇義勇同心貌
貅騁力雷奔電掣谷靜山空列郡無犬吠之驚叢祠罷狐
鳴之盜此又公之功也王師討虜次屆淪波兵乏兼儲土
有飢色公回麾蠡澤積穀巴坪億庾之詠斯豐壺漿之迎
是衆軍民轉漕會無砥柱之難舳艫相望如運敖倉之庀
犀渠貝冑顧茂雷霆高艦層樓仰捫霄漢故使三軍勇銳
百戰無前承此兵糧遂殄兇逆此又公之功也若夫英圖
邁俗義旅如雲溢壘猜攜用掩戎略公志唯同獎師克在
和鶴塞非虞鴻門是會若晉侯之誓白水如蕭王之推赤
心屈體交盟人祇感咽故使舟師竝路遠邇同心此又公
之功也姑孰襟要峭函阻憑寇虜據其關梁大盜負其肩
鏞公一校裁馮三雄竝奮左賢右角沙潰土崩木甲殪於
中原羣囊赴於江水他他藉藉萬計千羣鄂坂之隘斯開

夷庚之道無塞此又公之功也義軍大眾俱集帝京逆豎兇徒猶屯皇邑若夫表裏山河金湯險固疏龍首以抗殿前華嶽以爲城雜虜憑焉強兵自若公回茲地軸抗此天羅曾不崇朝俾無遺噍軍容甚穆國政方脩物重觀於衣冠民還瞻於禮樂楚人滿道爭視於葉公漢老銜悲俱觀於司隸此又公之功也內難初靖諸侯出關外郡傳烽鮮卑犯塞莫非且渠當戶中貴名王冀馬列於淮南胡笳動於徐北公舟師步甲亘野橫江殲厥羣叛遂殫封豨莫不往水而止戎車靡遺遇淨而還歸驂盡瘞此又公之功也公克黜禍難劬勞皇室而孫甯之黨翻啟狄心伊洛之間咸爲虜虜成雖金陵佳氣石墨天巖朝暗戎塵夜誼胡鼓公三籌旣畫八陣斯張裁舉靈鈺亦抽金僕咸倅醜類悉反高塘異李廣之皆誅同龐元之盡赦此又公之功也任約

駢七

八

叛換梟聲不悛戎羯貪婪狠心無改穹廬垂幕抵北闕而爲營烏孫天馬指東都而成陣公左甄右落箕張翼舒埽是機槍驅其獫狁長狄之種埋於國門權髻之囚烹於軍市投秦坑而盡沸噎澗水而不流此又公之功也一相居中自折彝鼎五湖小守妄懷同惡公夙駕兼道秉羽杖戈玉斧將揮金鉦且戒妖酋震懾遽請灰釘蒸櫬以表其含宏焚書以安其反側此又公之功也賊龕兇橫陵虐具區阻兵安忍憑災怙亂自古蟲言鳥迹混沌洪荒凡或虔劉未此殘酷公雖宗居汝穎世寓東南育聖誕賢之鄉含章挺生之地眷言桑梓公私憤切卓爾英狀承規奉算戮此大憝如烹小鮮此又公之功也亂離永久羣盜孔多浙左兇渠連兵構逆豈止十兵五校白雀黃龍而已哉公以中軍無率選是親賢好寇途窮漼然冰泮刑溘之所文命動

其大威雷門之間句踐行其嚴戮英規聖迹異代同風此
又公之功也同姓有扈頑凶不賓憑藉宗盟圖危社稷觀
兵匯澤勢震京師驅率南蠻已爲東帝公論兵廟堂之上
決勝尊俎之間寇賈樊滕浮江下瀨一朝揃撲無待甸師
萬里澄清非勞新息此又公之功也豫章妖寇依憑山澤
繕甲完聚各厯歲時結從連橫爰洎交廣呂嘉旣獲吳淠
已銳命我還師征其不恪連營盡拔僞黨斯擒曜聖武於
匡山回神旌於蠡派此又公之功也自入紘九野瓜剖豆
分竊帝偷王連州比縣公武靈已暢文德又宣折簡馳書
風猷斯遠至於蒼蒼浴日杳杳無雷北洎丈夫之鄉南踰
女子之國莫不屈膝膜拜求吏款關此又公之功也京師
禍亂亟積寒暄雙闕低昂九門寥豁宜秦宮之可顧豈魯
殿之猶存五都簪弁百僚卿士胡服縵纓成爲戎俗高冠

駢七

九

厚履希復華風宋微子麥穗之歌周大夫黍離之歎方茲
於斯未足爲悲矣公求衣昧旦晷食高春典構宮闈具瞻
遐邇膠庠宗稷之典六符十等之章還聞秦始之風流重
觀永平之遺事此又公之功也公有濟天下之勲重之以
明德凝神體道合德符天用百姓以爲心隨萬機而成務
恥一物非唐虞之民歸含靈於仁壽之域上德不德無爲
以爲夏長春生顯仁藏用忠信爲寶風雨弗愆仁惠爲基
牛羊勿踐功成治定樂奏咸雲安上治民禮兼文質物色
邱園衣裾里巷朝多君子野無遺賢菽粟同水火之饒工
商富猗頓之旅是以天無蘊寶地有呈祥灑露聊雲朝團
曉映山重澤馬服御登賢旣景煥於圖書方歲粃於史牒
高勲踰於象緯積德冠於嵩華罔無得而稱者矣朕又聞
之前王宰世茂賞尊賢式樹蕃長總征羣伯三南崇絕四

履遐曠決決表海胙土惟齊巖巖泰山俾侯於魯抑又勤
王反鄭夾輔遷周召伯之命斯隆河陽之禮咸備況復經
營宇宙寧惟斷鼇足之功宏濟蒼生非直鑿龍門之險而
酬庸報德寂爾無聞朕所以垂拱當宇載懷慙慙者也今
授公相國以南豫州之陳畱南丹陽宣城揚州之吳興東
陽新安新寧南徐州之義興江州之鄱陽臨川十郡封公
爲陳公錫茲青土苴以白茅爰定爾邦用建家社昔巨夷
分陝俱爲保師晉鄭諸侯咸作卿士兼其內外禮實攸宜
今命使持節兼太尉王通授相國印綬陳公璽紱使持節
兼司空王瑒授陳公茅土金獸符第一至第五左竹使符
第一至第十相國職踰三鉉任總百司位絕朝班禮由事
革其以相國總百揆除錄尚書之號上所假節侍中貂蟬
中書監印章中外都督太傅印綬義興公印策其鎮衛大

將軍揚州牧如故又加公九錫其敬聽後命以公禮爲楨
榦律等銜策四維皆舉八柄有章是用錫公大輅戎輅各
一元牡二駟以公賤寶崇穀疏爵待農室富京坻民知榮
辱是用錫公袞冕之服赤舄副焉以公調理陰陽變諧風
雅三靈允降萬國同和是用錫公軒縣之樂六佾之舞以
公宣導王猷宏闡風教光景所照鞅象必通是用錫公朱
戶以居以公抑揚清濁褒德進賢髦士盈朝幽人虛谷是
用錫公納陛以登以公巖然廊廟爲世鎔範折衝四表臨
御八荒是用錫公武賁之士三百人以公執茲明罰期在
刑措象恭無赦千紀必誅是用錫公斧鉞各一以公英猷
遠量跨厲嵩溟混一車書括囊寰宇是用錫公彤弓一彤
矢百旅弓十旅矢千以公天經地義貫徹幽明春露秋霜
允恭彙盛是用錫公秬鬯一卣圭瓚副焉陳國置丞相以

下一遵舊式往欽哉其恭循朕命克相皇天宏建邦家允興洪業以光我高祖之休命

魏禪晉策

咨爾晉王我皇祖有虞氏誕膺靈運受終于陶唐亦以命于有夏惟三后陟配于天而咸用光敷聖德自茲厥後天又輯大命于漢火德旣衰乃眷命我高祖方軌虞夏四代之明顯我不敢知惟王乃祖乃父服膺明哲輔亮我皇家勳德光于四海格爾上下神祇罔不克順地平天成萬邦以乂應受上帝之命協皇極之中肆予一人祇承天序以敬授爾位歷數實在爾躬允執其中天祿永終於戲王其欽順天命率循訓典底綏四國用保天休無替我二皇之宏烈

齊禪梁策

駢七

七

咨爾梁王惟昔邃古之載肇有生人皇雄大庭之辟赫胥尊盧之后斯並龍圖鳥跡以前慌忽杳冥之世固無得而詳焉泊乎農軒炎皞之代放勛重華之主莫不以大道君萬姓公器御八紘居之如執朽索去之如捐重負一駕汾陽便有宥然之志蹇適箕嶺卽動讓王之心故知戴黃屋服玉璽非所以示貴稱尊乘大輅建龍旂蓋欲合歸趣有地是故忘已而字兆人殉物而君四海及于精華內竭畚櫛外勞則撫茲歸運惟能是與况兼乎筮管革文威圖啓瑞攝提夜朗熒光晝發者哉四百告終有漢所以高揖黃德旣謝魏氏所以樂推爰及晉宋亦宏斯典我太祖握河受歷應符啓運二葉重光三聖係軌嗣君喪德昏弃紀度毀紊天綱凋絕地紐茫茫九域翦爲仇讎溥天相顧命懸晷刻斯涉列孕于事已輕求雞微杖曾何足譬是以谷滿

川枯山飛鬼哭七廟已危人神無主惟王體茲上哲明聖
在躬稟靈五緯明並日月彝倫攸序則端冕而協鬯熙時
難孔棘則推鋒而拯塗炭功逾造物德濟蒼生澤無不漸
仁無不被上達蒼昊下及川泉文教與鵬翼齊舉武功與
日車並運固以幽顯宅心謳訟斯屬豈徒桴鼓播地卿雲
叢天而已哉至如晝觀爭明夜飛枉矢上淪彗刺日旣心
亾除舊之徵畢顯更姓之符允集是以義師初踐芳露凝
甘仁風旣被素文自擾北關藁街之使風車火徼之民膜
拜稽首願爲臣妾鐘石畢變事表於遷虞蛟魚並出義彰
于事夏若夫長人御衆爲之司牧本同已于萬物乃因心
於百姓寶命無常主帝王非一族今仰祇乾象俯藉人願
敬禪神器授帝位于爾躬大祚告窮天祿永終於戲王允
執其中式遵前典以副昊天之望禋上帝而臨億兆格文
祖而膺大業以傳無疆之祚豈不盛歟

駢七

十三

合何蕭氏
列粹家謂

蜀漢先主成都卽位告天文

此文尙有典誥遺意其事本得正也

惟建安二十六年四月丙午皇帝備敢用元牡昭告阜天上帝后土神祇漢有天下歷數無疆曩者王莽篡盜光武皇帝震怒致誅社稷復存今曹操阻兵安忍戮殺主后消天泯夏罔顧天顯操子不載其凶逆竊居神器羣臣將士以爲社稷隳廢備宜修之嗣武二祖冀行天罰備惟否德懼忝帝位詢於庶民外及蠻夷君長僉曰天命不可以不答祖業不可以久替四海不可以無主率土式望在備一人備畏天明命又懼漢邦將溼於地謹擇元日與百寮登壇受皇帝璽綬修燔瘞告類於天神惟神饗祚於漢家永綏四海

駢入

齊高祖卽位告天文

皇帝臣某敢用元牡昭告于皇皇后帝宋帝陟鑿乾序欽若明命以命于某夫肇自生民樹以司牧所以闡極則天開元創物肆茲大道天下惟公命不于常昔在虞夏受終上代粵自漢魏揖讓中葉咸炳諸典謨載在方冊水德旣微仍世多故實賴某匡拯之功以宏濟于厥艱大造顛墜再構區宇宣禮明刑締仁緝義晷緯凝象川岳表靈誕惟天人罔弗和會乃仰協歸運景屬與能用集大命于茲辭德匪嗣至于累仍而羣公卿士庶御事爰及黎獻至于百戎僉曰皇天眷命不可以固違人神無託不可以曠主畏天之威敢不茲從鴻厯敬簡元辰虔奉皇符升壇受禪告類上帝以永答民衷式敷萬國惟明靈是饗

匡稚圭禱高祖孝文孝武廟文

嗣會孫皇帝恭承洪業以夜不敢康寧思育休烈以章祖宗之盛功故動作接神必因古聖之經在者有司以爲前因所幸而立廟將以繫海內之心非爲尊祖嚴親也今賴宗廟之靈六合之內莫不附親廟宜一居京師天子親奉郡國廟可止無修皇帝祗肅舊禮尊重神明卽告于祖宗而不敢失今皇帝有疾不豫乃夢祖宗見戒以廟楚王夢亦有其序皇帝悼懼卽詔臣衡復修立謹案上世帝王承祖禰之大義皆不敢不自親郡國吏卑賤不可使獨承又祭祀之義以民爲本問者歲數不登百姓困乏郡國廟無以修立禮凶年則歲事不舉以祖禰之意爲不樂是以不敢復如誠非禮義之中違祖宗之心咎盡在臣衡當受其殃大被其疾隊在溝瀆之中皇帝至孝肅慎宜蒙祐福唯高皇帝孝文皇帝孝武皇帝省察右饗皇帝之孝開賜皇帝眉壽亡疆令所疾日瘳平復反常永保宗廟天下幸甚匡稚圭告祭毀廟文

往者大臣以爲在昔帝王承祖宗之休典取象于天地天序五行人親五屬天子奉天故率其意而尊其制是禘嘗之序靡有過五受命之君躬接于天萬世不墮繼列以下五廟而遷上陳太祖間歲而祫其道應天故福祿永終太上皇非受命而屬盡義則當遷又以爲孝莫大于嚴父故父之所尊子不敢不承父之所異子不敢同禮公子不得爲母信爲後則於子祭于孫止尊祖嚴父之義也寢日四上食園廟問祠皆可亡修皇帝思慕悼懼未敢盡從惟念高皇帝聖德茂盛受命溥將欽若稽古承順天心子孫本支陳錫無疆誠以遷廟合祭久長之策高皇帝之意廼敢不聽卽以今日遷太上孝惠廟孝文太后孝昭太后寢將

以昭祖宗之德順天人之序定亡窮之業今皇帝未受茲
福乃有不能供職之疾皇帝願復修立承祀臣衡等咸以
爲禮不得如不合高皇帝孝惠皇帝孝文皇帝孝武皇帝
孝昭皇帝孝宣皇帝太上皇孝文太后孝昭太后之意罪
盡在臣衡等當受其咎今皇帝尚未平詔中朝臣具復毀
廟之文臣衡中朝臣咸復以爲天子之祀義有所斷禮有
所承違統背制不可以奉先祖皇天不祐鬼神不饗六藝
所載皆言不當無所依緣以作其文事如失指罪迺在臣
衡當深受其殃皇帝宜厚蒙祉福嘉氣日興疾病平復永
保宗廟與天無極羣生百神有所歸息

蔡伯喈遷都告廟文

嗣曾孫皇帝某敢昭告于皇祖高皇帝各以后配昔受命
京師都于長安享國十有一世歷年二百一十載遭王莽

駢人

三

之亂宗廟墮壞世祖復帝祚還都洛陽以服土中享國一
十一世歷年一百六十五載子末小子遭家不造早統洪
業奉嗣無疆關東吏民敢行稱亂總連州縣擁兵聚衆以
圖叛逆震驚王師命將征服股肱大臣推皇天之命以已
行之事遷都舊京昔周德缺而斯干作應運變通自古有
之于是乃以三月丁亥來自雒越三月丁巳至于長安飭
躬不慎寢疾旬日賴祖宗之靈以獲有瘳吉旦齊宿敢用
潔牲一元大武柔毛剛鬣商祭明視薌合嘉蔬香其醜醴
豐本明粢醴酒用告遷來尚饗

謝元暉祭大雷何周二神文

大過在運小雅盡缺瓊鏡口淪金車未晰周生電斷神謨
英冠正因部奇風斂雲散晉德如燬功資叶贊山無猛鷲
時曠忠賢流王于統龜鼎忽焉忠肅布衣君親自然驅狐

上國斬鯢中川紛綸凱入氛氲配天

江文通蕭太傅東耕祝文

敬祝先穡曰攝提方春黍稷未華灼爍發雲昭耀開霞地
煦景暖山艷水波側聞農政實惟民天競秬獻歲務畎上
年有渰疏潤興雨導泉崇耕巡索均逸其勞命彼信人稅
於青臯羽旗銜蕤雄戟耀毫呈典繙耦獻禮翠壇宜民宜
稼克降祈年願靈之降解珮停鑿神之行兮氣爲轂神之
坐兮煙爲蓋使嘉穀與元瓔永爭光而無沫

盧子行遼陽山寺願文

事旣不經文亦冗弱以其爲當時所尚故附存之

齊興二十有三載區宇乂安列聖重光百神受職天平地
成禮諧樂暢劔戟忘鑄江海無波皇帝體膺上哲運鍾下
武以至德字黔首大明臨赤縣深仁俯漏惠化潛通榮鏡

駢入

四

六幽昭蘇入表唐旌已立芻輿不遠而至殷網旣開肖翹
咸遂其所壇凝休氣渚幕榮光元扈告符翠琰啟籙阿閣
朝諠棘林夜靜西瑄協律南鬯迎神衣氣操龜之俗懷音
請吏反踵修股之渠膜拜空首四海懾然中外禔福尉候
無警書軌大同猶以爲負辰垂旒人世微業功成治定域
中小道投心覺海束意元門手執明珠頂文甘露調御天
人不徇巖廊之重明行具足宥屑裘冕之尊十力四心東
漸西被日月出矣風雨潤之屠門鮑肆化成嚴淨之所蟬
蛸蟪蛄綱於仁壽之域參墟奧壤王跡所基密都是宅別
館攸在襟帶遐長原陸爽秀高巖鬱起作鎮東偏峰羅羣
玉鷲頭之狀非美樹列三珠鷄足之形可陋洞穴條風生
和雅之曲圓珠積水流清妙之音於是玉燭調年金商在
律職方具禮效駕西巡六龍齊轡七萃按部雷動星移凝

鑿佇輝乃建仁祠於勝地成之不日旣麗且康昔周夜初
明漢池云鑿事隔荒裔道若存亡哲王馭歷宏濟區宇前
聖後聖旦暮爲期以此勝因仰爲武成皇帝及清廟神靈
願西邁彌陀上征兜率雄視三界高臨四衢百年之神俯
輕羣后一音所導遠同佛日皇太后福踰江水社邁塗山
壽比太陰業均厚載聖主齊明兩曜合德二儀受錄錯於
靈河開金簡於仙嶽龍官鳥紀未可匹其光大象天任地
焉能踰其長久皇太子德茂元良道高上嗣牢籠啟誦孕
育莊丕六宮眷屬諸王昆弟皆智慧莊嚴玉華松茂永侍
披香長固磐石以茲博利被於萬品當使法界虛空生靈
動植俱沐定水同蔭法雲斯誓或差無取正覺

隋煬帝寶臺經藏願文

菩薩戒弟子楊廣和南仰惟如來應世聲教被物慇懃微

聯八

五

密結集法藏帝釋輪王旣被付囑菩薩聲聞得揚大化度
脫無量以迄于今至尊拯溺百王混一四海平陳之日道
俗無虧而東南愚民餘瘡相煽爰受廟畧重清海濱役不
勞師以時寧復深慮靈象尊經多同煨燼結髮繩墨湮滅
溝渠是以遠命衆軍隨方收聚未及期月輕舟總至乃命
學司依名次錄并延道場義府覃思澄明所由用意惟比
多得本類莊嚴修葺其舊惟新寶臺四藏將十萬軸因發
宏誓永事流通仍書願文悉連卷後頌屬朝覲著功始畢
今止寶臺正藏親躬受持其次藏已下則慧日法靈道場
日嚴宏善靈刹此外京都寺塔諸方精舍而梵宮互有大
小僧徒亦各衆寡並隨經部多少斟酌分付授者旣其懇
至受者亦宜殷重長存法本遠布達摩必欲傳文來入寺
寫勿使零落兩失無作前佛後佛諒同金口卽教當教寧

殊玉牒須彌山上衆聖共持金剛海底天龍盡護散在閻
浮亦復如是追念繕寫之者厥誠至隆心手勤到何量功
德捨撤淨財豈可稱計所資甘雨用沃焦芽能生是佛本
是般若人能宏法非道宏人恕已深恩卽是自爲今陳此
意乃似執著若不開警則不深固自行化他備在經律顧
循非識誠媿通方因果相推何殊眼見豈不知獨善且最
勝無爲第一樂內典法奧自關衆僧何事區區橫相負荷
但慶憑宿植生長王宮謁陛趨庭最存遠大出受藩寄每
用祇兢非惟禮政刑一遵成旨而舟航運出彌奉弗墜無
容棄稷禹而同園綺變菩薩而作聲聞越用乖方旣其不
可篤信受付竊敢當仁然五種法師俱得六根清淨而如
說修行涅槃最近徒守經律不依佛戒口便說空心滯於
有無上醫王隨病還藥開乳舍酥爲方旣異甜冷苦熱取

療亦殊譬前後教門別赴機性根莖枝葉受潤終齊總會
津梁無不入道猶如問孝問仁孔酬雖別治身治國老意
無乖殊途同歸一致百慮內外相融義同泯合何有學毘
曇而不成聖執黎耶卽能悟真師子嚴鎧反貼毀于羸目
象足至底翻取詣于蜂房心同劒戟諍踰水火經意論意
都不如斯通經通論何因若此恐施甘露更成毒藥儻均
味海則致醍醐聖御紺寶天飛金輪雲動納萬善于仁壽
總一乘于普會開發含識濟度羣生今所傳經遍于宇內
衆聖潛力必運他方共登菩提早證常樂則是弟子之伸
順宏誓于無窮平等坦然通遣唱白達識體之念隨喜也

王子贛救掾功曹教

掾功曹各自底厲助太守為治其不中用趣自避退毋久妨賢夫羽翮不修則不可以致千里閭內不理無以整外府丞悉署吏行能分別白之賢為上毋以富賈人百萬不足與計事昔孔子治魯七日誅少正卯今太守視事已一月矣五官掾張輔懷虎狼之心貪污不軌一郡之錢盡入輔家然適足以葬矣今將輔送獄直符史詣閣下從太守受其事丞戒之戒之相隨入獄矣

魏文帝以鄭稱為武德侯傳令

龍淵太阿出昆吾之金和氏之璧由井里之田礪之以砥礪錯之以他山故能致連城之價為命世之寶學亦人之砥礪也稱篤學大儒勉以經學輔侯宜旦夕入侍曜明其

駢九

志

曹子建黃初六年下國中令

此令文館詞林所載辭繁于此今從本集

身輕于鴻毛而謗重于泰山賴蒙帝主天地之仁違百司之典議舍三千之首戾反我舊居襲我初服雲雨之施焉有量哉孤以何功而納斯貶富而不恠寵至不驕者則周公其人也孤小人耳身更以榮為戚何者將恐簡易之尤出于細微脫爾之愆一朝復露也故欲脩吾在業守吾初志欲使皇帝恩在摩天使孤心常存此地將以全陛下厚德究孤犬馬之年此難能也然固欲行衆之難詩曰德輶如毛鮮克舉之此之謂也

傅季友為宋公脩張良廟教

綱紀夫盛德不泯義存祀典微管之歎撫事彌深張子房道亞黃中照隣殆庶風雲元感蔚為帝師夷項定漢大拯

橫流固已參軌伊望冠德如仁若乃神交圯上道契商洛
顯默之際窅然難究淵流浩養莫測其端矣塗次舊沛佇
駕留城靈廟荒頓遺象陳珠撫跡懷人永歎實深過大梁
者或佇想於夷門游九原者亦流連於隨會疑之若人亦
足以云可改構棟宇修飾丹青蘋蘩行潦以時致薦抒懷
古之情存不刊之烈王者施行

傳季友爲宋公修楚元王墓教

綱紀夫褒賢崇德千載彌光尊本敬始義隆自遠楚元王
積仁基德啓蕃斯境素風道業作範後昆本支之祚實隆
鄙宗遺芳餘烈奮乎百世而邱封翳然墳塋莫翦感遠存
往慨然永懷夫愛人懷樹甘棠且猶勿剪追甄墟墓信陵
尙或不泯况瓜瓞所興開源自本者乎可蠲復近墓五家
長給灑掃便可施行

駢九

江文通建平王聘隱逸教

府州國紀綱夫鳩夏已沒大道不行雖周惠之富猶有魚
潭之士漢教之隆亦見棲山之夫迹絕絕雲氣意負青天皆
待絳螭驥首翠虬來儀是以遺風獨扇百代餘烈激厲後
生斯乃王教之助古人之意焉吾稅駕舊楚恩乘汀潭挹
於陵之操想漢陰之高而山川遐久流風無沫養志數人
並未徵采善操將棄良用慨然宜速詳舊禮各遣纁招庶
暢此幽襟以旌蓬華

任彥升宣德皇后令

宣德皇后敬問具位夫功在不賞故庸勲之典蓋闕施俸
造物則謝德之途已寡也要不得不彊爲之名使荃宰有
寄公實天生德齊聖廣淵不改參辰而九星仰止不易日
月而二儀貞觀在昔胸明隱鱗戢翼博通羣籍而讓齒乎

一卷之師劍氣凌雲而屈迹於萬夫之下辨析天口而以不能言文擅雕龍而成輒削藁爰在弱冠首應弓旌客遊梁朝則聲華籍甚薦名宰府則延譽自高隆昌季年勤王始著建武維新締構斯在功隆賞薄嘉庸莫酬一馬之田介山之志愈厲六百之秩大樹之號斯存及擁旄司部代馬不敢南牧推轂焚鄧胡塵罕嘗夕起惟彼狡童窮凶極虐衣冠泯絕禮樂崩喪旣而鞠旅誓衆言謀王室白羽一麾黃鳥底定甲旣鱗下車亦瓦裂致天之屈拱揖羣后豐功厚利無得而稱是以祥光總至休氣四塞五老游河飛星入昴元功茂勲若斯之盛而地狹乎四履勢卑乎九伯帝有愆焉輶軒萃止今遣某位某甲等率茲百辟人致其誠庶匪席之旨不遠而復

蕭彥達爲荊州刺史下教

駢九

三

夫鴟火之禽不匿影於丹山昭華之寶乍耀采於藍田是江漢有濯纓之歌空谷著來思之詠宏風闢道靡不由茲處士河東韓懷明南平韓望南郡庾承先河東郭麻並脫落風塵高蹈其事兩韓之孝友純深庾郭之形骸枯槁或橡飯菁羹惟日不足或葭牆艾席樂在其中昔伯武貞堅就任河內史雲孤邵屈志陳留豈曰場苗實惟攻玉可加引辟并遣喻意旣同魏侯致禮之請庶無辟疆三緘之歎邱希範永嘉郡教

貴郡控帶山海利兼水陸實東南之沃壤一都之巨會而曝背拘牛屨空於畎畝績麻治絲無聞於塗巷其有耕灌不修桑榆靡樹遨遊鄜里酣觴卒歲越伍乖隣流宕忘返才異相如而四壁獨立高慚仲蔚而三徑没人雖謝文翁之正俗庶幾冀遂之移風

陸佐公至潯陽郡教

第五倫之臨會稽躬斬馬草鄧伯道之莅吳郡自運家糧故能使吏作頌歌民胥興詠太守薄德謬叨竊組竊願巴祗闇坐接客思匹吳應被絮對賓常藥自隨式瞻無遠單車入境竊所庶幾舊須發民治道又戍邏掄樵採諸如此類一皆省息

梁武帝禁奢令

夫在上化下草偃風從世之澆淳恒由此作自永元失德書契未紀窮凶極悖焉可勝言旣而璇室外構傾宮內積奇技異服殫所未見上慢下暴淫侈競馳國命朝權遂移近習販官鬻爵賄貨公行竝甲第康衢漸臺廣室長袖低昂等和戎之賜珍羞百品同伐冰之家愚人因之浸以成俗驕豔競爽夸麗相高至乃市井之家貂狐在御工商之

駢九

四

子緹繡是襲日入之次夜分未反昧爽之朝期之清旦聖明肇運厲精惟始雖曰纘戎殆同創革且淫費之後繼以興師巨橋鹿臺洞壑不一孤忝荷大寵務在澄清思所以仰述皇朝大帛之旨俯厲微躬鹿裘之義解而更張斲雕爲樸自非可以奉棗盛修黻冕習禮樂之容繕甲兵之備此外衆費一皆禁絕御府中署量宜罷省掖庭備御妾之數大饗絕鄭衛之音其中有可以率先卿士準的毗庶菲食薄衣請自孤始加羣才竝軌九官成事若能人務退食競存約己移風易俗庶期月有成昔毛玠在朝士大夫不敢靡衣偷食魏武歎曰孤之法不如毛尚書孤雖德謝往賢任重先達實望多士得其此心外可詳爲條格

梁簡文帝與劉孝儀令

賢從中庶奄至殞逝痛可言乎其孝友淳深立身貞固內

含玉潤外表瀾清美譽嘉聲流于士友言行相符始終如一
一文史該富琬琰爲心辭章博瞻元黃成采旣以鳴謙表
性又以難進自居未嘗造請公卿締交榮利是以新沓莫
之舉杜武弗之知自阮放之官野王之職栖遲門下已踰
五載同僚已陟後進多升而怡然清靜不以少多爲念確
爾之志亦何易得西河觀寶東江獨步書籍所載必不是
過吾昔在漢南連翩書記及忝朱方從容坐首良辰美景
清風月夜鴻舟乍動朱鷺徐鳴未嘗一日而不追隨一時
而不會遇酒闌耳熟言志賦詩校覆忠賢權揚文史益者
三友此寔其人及宏道下邑未申善政而能使民結去思
野多馴雉此亦威鳳一羽足以驗其五德比在春坊載獲
申晤博望無通賓之務司成多節文之料所賴故人時相
嬾偶而此子溘然實可嗟痛惟與善人此爲虛說天之報
施豈若此乎想卿痛悼之誠亦當何已往矣奈何投筆慟
愴吾昨欲爲誌銘并爲撰集吾之劣薄其生也不能掄揚
吹噓使得騁其才用今者爲銘爲集何益旣往故爲痛惜
之情不能已已耳

梁簡文帝與湘東王論王規令

威明昨宵奄復殂化甚可痛傷其風韻道正神峰標映千
里絕迹百尺無枝文辨縱橫才學優贍跌宕之情彌遠濠
梁之氣特多斯寔俊民也一爾過礪永歸長夜金刀掩芒
長淮絕澗去歲冬中已傷劉子今茲寒孟復悼玉生俱往
之傷信非虛說

梁簡文帝移市教

臨淮作守白鹿隨而忘返蕭令解綬黃雀從而歸况復
衛卒遮車追民擁榜瞻言前古眇愧宏多吾旅泊冬川阻

茲涸水日中總會支買遷移雖樊無外取要得所求而旗
亭舊體自有常處不容近違孔奮遠逐曹參正恐舊肆盈
虛或成彫廢

梁簡文帝罷雍州恩教

折以片言事關在聖寄之勿擾傳彼昔賢故刻木不對畫
獄無入吾自之雍矜懷固狂幸得天無虛旱地歇怪蟲今
軸車行塗舟艋且栽植柳官渡尙或依然寄飯曹僮猶思
恩宥况義化君民節離寒暑憫茲岐路宜留惠澤

梁簡文帝與僧正教

此州伽藍支提基列雖多設莊嚴盛修供具觀其外迹必
備華侈在乎意地寔有未宏何者凡鑄金刻木鏤漆圖瓦
蓋所以仰傳應身遠注靈覺羨龍瓶之始晨迥鴿林之餘
慕故祭神如在敬神之道既極去聖茲遠懷聖之理必深

駢九

六

此土諸寺止于應生之日則鑿列形像自斯以後封以篋
笥乃至棄服離身尋炎去頂或十尊五聖共處一厨或大
士如來俱藏一櫃信可謂心與事背貌是情非增上意多
精進心少昔塔裡紅函止傳舍利象頭白繖非謂全身夫
以畫像追陳尙使吏民識敬鎔金圖範終令越主懷思匹
以龍阿尙能躍鞘方之虎兕猶稱出柙况復最大圓慈無
上善聚聞名去煩見形入道而可慢此雕香蘊斯木檣緘
匿玉毫封印金掌旣殊羅閱久入四天又異祇洹掩戶三
月寶殿空臨瓊階虛敞密帷不閉非仲舒之曲學紅壁長
掩似邠卿之避讎且廣廈雲垂崇甍烏跂若施之玉座飾
以金鈿必不塵靄日姿鴈點川面琉璃密窻自可輕風難
入龍鬚細網足使飛燕不過兼得虔敬之理必崇接足之

心彌重可卽宣勒永使淮行

梁元帝課耕令

軍國多虞戎旃未靜青領雖熾黔首宜安時惟星鳥表年
祥于東秩春紀宿龍歌歲取于南峻况三農務業尙看天
桃敷水四人有令猶及落杏飛花化俗移風常在所急勸
耕且戰彌須自許豈直燕垂寒谷積黍自溫寧可墮此元
苗坐餐紅粒不植鸞領空候蟬鳴可悉深耕溉種安堵復
業無棄民力竝分地利班勒州郡咸使遵承

周文帝下朝士令


古之帝王所以外建諸侯內立百官者非欲富貴其身而
尊榮之蓋以天下至廣非一人所能獨治是以博訪賢才
助己爲治若其知賢也則以禮命之其人聞命之日則慘
然曰凡受人之事任人之勞何捨己而從人又自勉曰天
生儒士所以利時彼人主者欲與我爲治安可苟辭於是

駢九

七



降心而受命及居官也則晝不甘食夜不甘寢思所以上
匡人主下安百姓不遑恤其私而憂其家故妻子或有饑
寒之弊而不顧也於是人主賜之以俸祿尊之以軒冕而
不以爲惠也賢臣受之亦不以爲德也位不虛加祿不妄
賜爲人君者誠能以此道授官爲人臣者誠能以此情受
位則天下之大可不言而治矣昔堯舜之爲君稷契之爲
臣用此道也及後世衰微此道遂廢乃以官職爲私恩爵
祿爲榮惠人君之命官也親則授之愛則任之人臣之受
位也可以尊身而潤其屋者則迂道而求之損身而利物
者則巧言而辭之於是至公之道沒而姦詐之萌生天下
不治正爲此矣今聖主中興思去澆僞諸在朝之士當念
職事之艱難負闕之招累夙夜兢兢如臨深履薄才堪者
則審已而當之不堪者則收短而避之使天官不妄加王

爵不虛受則淳素之風庶幾可反



駢九

八



駢體文鈔卷九

鼂錯對賢良文學策

從任賢立說實隱然自負其詞泛濫遂覺塗徑欲迷

惟十有五年九月壬子皇帝曰昔者大禹勤求賢士施及方外四極之內舟車所至人跡所及靡不聞命以輔其不逮近者獻其明遠者通厥聰比善戮力以翼天子是以大禹能亡失德夏以長懋高皇帝親除大害去亂從並建豪英以爲官師爲諫爭輔天子之闕而翼戴漢宗也賴天之靈宗廟之福方內以安澤及四夷今朕獲執天下之正以承宗廟之祀朕旣不德又不敏明弗能燭而智不能治此大夫之所著聞也故詔有司諸侯王三公九卿及主郡吏各帥其志以選賢良明於國家之大體通于人事之終始及能直言極諫者各有人數將以匡朕之不逮二三大夫

駢十

之行當此三道朕甚嘉之故登大夫于朝親諭朕志大夫其上三道之要及永惟朕之不德吏之不平政之不宣民之不寧四者之闕悉陳其志母有所隱上以薦先帝之宗廟下以興愚民之休利著之于篇朕親覽焉觀大夫所以佐朕至與不至書之周之密之重之閉之興自朕躬大夫其正論毋枉執事烏虜戒之二三大夫其帥志母怠

平陽侯臣窋汝陰侯臣竈頰陰侯臣何廷尉臣宜昌隴西太守臣昆邪所選賢良太子家令臣錯昧死再拜言臣竊聞古之賢主莫不求賢以爲輔翼故黃帝得力牧而爲五帝先大禹得咎繇而爲三王祖齊桓得筦子而爲五伯長今陛下講于大禹及高皇帝之建豪英也退託於不明以求賢良讓之至也臣竊觀上世之傳若高皇帝之建功業陛下之德厚而得賢佐皆有司之所覽刻於玉版藏於金

匱歷之春秋紀之後世爲帝者祖宗與天地相終今臣竊
等廼以臣錯充賦甚不稱明詔求賢之意臣錯中茅臣亡
識知昧死上愚對曰詔策曰明於國家大體愚臣竊以古
之五帝明之臣聞五帝神聖其臣莫能及故自親事處于
法宮之中明堂之上動靜上配天下順地中得人故衆生
之類亡不覆也根著之徒亡不載也燭以光明亡偏異也
德上及飛鳥下至水蟲草木諸產皆被其澤然後陰陽調
四時節日月光風雨時膏露降五穀熟祆孽滅賊氣息民
不疾疫河出圖洛出書神龍至鳳鳥翔德澤滿天下靈光
施四海此謂配天地治國大體之功也詔策曰通於人事
終始愚臣竊以古之三王明之臣聞三王臣主俱賢故合
謀相輔計安天下莫不本於人情人情莫不欲壽三王生
而不傷也人情莫不欲富三王厚而不困也人情莫不欲

駢十

二

安三王扶而不危也人情莫不欲逸三王節其力而不盡
也其爲法令也合於人情而後行之其動衆使民也本於
人事然後爲之取人以已內恕及人情之所惡不以彊人
情之所欲不以禁民是以天下樂其政歸其德望之若父
母從之若流水百姓和親國家安寧名位不失施及後世
此明於人情終始之功也詔策曰直言極諫愚臣竊以五
伯之臣明之臣聞五伯不及其臣故屬之以國任之以事
五伯之佐之爲人臣也察身而不敢誣奉法令不容私盡
心力不敢矜遭患難不避死見賢不居其上受祿不過其
量不以亡能居尊顯之位自行若此可謂方正之士矣其
立法也非以苦民傷衆而爲之機陷也之以興利除害尊
主安民而救暴亂也其行賞也非虛取民財妄予人也以
勸天下之忠孝而明其功也故功多者賞厚功少者賞薄

如此歛民財以顧其功而民不恨者知與而安已也其行罰也非以忿怒妄誅而從暴心也以禁天下不忠不孝而害國者也故擧大者罰重擧小者罰輕如此民雖伏罪至死而不怨者知罪罰之至自取之也立法若此可謂平正之吏矣法之逆者請而更之不以傷民主行之暴者逆而復之不以傷國救主之失補主之過揚主之美明主之功使主內亡邪辟之行外亡驚汚之名事君若此可謂直言極諫之士矣此五伯之所以德匡天下威正諸侯功業甚美名聲章明舉天下之賢主五伯與焉此身不及其臣而使得直言極諫補其不逮之功也今陛下人民之衆威武之重德惠之厚令行禁止之執萬萬於五伯而賜愚臣策曰匡朕之不逮愚臣何足以讖陛下之高明而奉承之詔策曰吏之不公政之不宣民之不寧愚臣竊以秦事明之

臣聞秦始并天下之時其主不及三王而臣不及其佐然功力不遲者何也地形便山川利財用足民利戰其所與並者六國六國者臣主皆不肖謀不輯民不用故當此之時秦最富彊夫國富彊而鄰國亂者帝王之資也故秦能兼六國立爲天子當此之時三王之功不能進焉及其末塗之衰也任不肖而信讒賊宮室過度者慾亡極民力罷盡賦歛不節矜奮自賢羣臣恐諛驕溢縱恣不顧患禍妄賞以隨喜意妄誅以快怒心法令煩僭刑罰暴酷輕絕人命身自射殺天下寒心莫安其處姦邪之吏乘其亂法以成其威獄官主斷生殺自恣上下瓦解各自爲制秦始亂之時吏之所先侵者貧人賤民也至其中節所侵者富人更家也及其末塗所侵者宗室大臣也是故親疎皆危外內咸怨離散遁逃人有走心陳勝先倡天下大潰絕祀亡

世爲異姓福此吏不平政不宣民不寧之禍也今陛下配天象地覆露萬民絕秦之迹除其亂法躬親本事廢去淫末除苛解媿寬大愛人肉刑不用學人亡帑非謗不治鑄錢者除通關去塞不孽諸侯賓禮長老愛卹少孤舉人有期後宮出嫁尊賜孝悌農民不租明詔軍師愛士大夫求進方正廢退姦邪除去陰刑害民者誅憂勞百姓列侯就都親耕節用視民不奢所爲天下與利除害變法易故以安海內者大功數十皆上世之所難及陛下行之道純德厚元元之民幸矣詔策曰永惟朕之不德愚臣不足以當之詔策曰悉陳其志母有所隱愚臣竊以五帝之賢臣明之臣聞五帝其臣莫能及則自親之三王臣主俱賢則共憂之五伯不及其臣則任使之此所以神明不遺而聖賢不廢也故各當其世而立功德焉傳曰往者不可及來者

駢十

四

猶可待能明其世者謂之天子此之謂也竊聞戰不勝者易其地民貧窮者變其業今以陛下神明德厚資財不下五帝臨制天下至今十有六年民不益富盜賊不衰邊境未安其所以然意者陛下未之躬親而待羣臣也今執事之臣皆天下之選已然莫能望陛下清光譬之猶五帝之佐也陛下不自躬親而待不望清光之臣臣竊恐神明之遺也日損一日歲亡一歲日月益暮盛德不及究於天下以傳萬世愚臣不自度量竊爲陛下惜之昧死上狂惑少茅之愚臣言唯陛下財擇

公孫宏對賢良文學策

精深不逮江都而切實簡當得開說之體

蓋聞上古至治晝衣冠異章服而民不犯陰陽和五穀登六畜蕃甘露降風雨時嘉禾興朱草生山不童澤不涸麟

鳳在郊數龜龍游于沼河洛出圖書文不喪子兄不哭弟
北發渠搜南撫交趾舟車所至人跡所及跂行喙息咸得
其宜朕甚嘉之今何道而臻乎此子大夫修先聖之術明
君臣之義講論洽聞有聲乎當世敢問子大夫天人之道
何所本始吉凶之效安所期焉禹湯水旱厥咎何由仁義
禮知四者之宜當安設施屬統垂業鬼物變化天命之符
廢興何如天文地理人事之紀子大夫習焉其悉意正議
詳具其對著之于篇朕將親覽焉靡有所隱

臣聞上古堯舜之時不貴爵賞而民勸善不重刑罰而民
不犯躬率以正而遇民信也末世貴爵厚賞而民不勸深
刑重罰而姦不止其上不正遇民不信也夫厚賞重刑未
足以勸善而禁非必信而已矣是故因能任官則分職治
去無用之言則事情得不作無用之器卽賦歛省不奪民

時不妨民力則百姓富有德者進無德者退則朝廷尊有
功者上無功者下則羣臣遠罰當罪則姦邪止賞當賢則
臣下勸凡此八者治之本也故民者業之則不爭理得則
不怨有禮則不暴愛之則親上此有天下之急者也故法
不遠義則民服而不離和不遠禮則民親而不暴故法之
所罰義之所去也和之所賞禮之所取也禮義者民之所
服也而賞罰順之則民不犯禁矣故畫衣冠異章服而民
不犯者此道素行也臣聞之氣同則從聲比則應今人主
和德於上百姓和合於下故心和則氣和氣和則形和形
和則聲和聲和則天地之和應矣故陰陽和風雨時甘露
降五穀登六畜蕃嘉禾興朱草生山不童澤不涸此和之
至也故形和則無疾無疾則不夭故父不喪子兄不哭弟
德配天地明並日月則麟鳳至龜龍在郊河出圖洛出書

遠方之君莫不說義奉幣而來朝此和之極也臣聞仁者愛也義者宜也禮者所履也智者術之原也致利除害兼愛無私謂之仁明是非立可否謂之義進退有度尊卑有分謂之禮擅殺生之柄通壅塞之塗權輕重之數論得失之道使遠近情僞必見於上謂之術凡此四者治之本道之用也皆當設施不可廢也得其要則天下安樂法設而不用不得其術則主蔽於上官亂於下此事之情屬統垂業之本也臣聞堯遭鴻水使禹治之未聞禹之有水也若湯之旱則桀之餘烈也桀紂行惡受天之罰禹湯積德以王天下因此觀之天德無私親順之和起逆之害生此天文地理人事之紀臣宏愚竊不足以奉大對

摯仲洽賢良對策

時詔諸賢良方正會東堂策問虞對羅爲太子舍人

臣聞古之聖明原始以要終體本於正末改憂法度之不

駢十

六

當而不憂人物之失所憂人物之失所而不憂災害之流行誠以法得於此則物理於彼人和於下則災消於上其有日月之眚水旱之災則反聽內視求其所由遠考諸物近驗諸身耳目聽察豈或有蔽其聰明者乎動心出令豈或有傾其常正者乎大官大職豈或有授非其人者乎賞罰黜陟豈或有不得其所者乎河濱山巖豈或有懷道釣築而不感於夢兆者乎方外遐裔豈或有命世傑出而未蒙膏澤者乎推此類也以求其故詢事考言以盡其實則天人之情可得而見咎徵之至可得而救也若推之於物則無忤求之於身則無尤萬物理順內外咸宜祝史正辭言不負誠而日月失行天厲不戒此則陰陽之事非吉凶所在也期運度數自然之分固非人事所供禦其亦振廩散滯貶食省用而已矣是故誠遇期運

雖陶唐殷湯

有所不變苟非期運則宋衛之君諸侯之相猶能有感唯陛下審其所由以盡其理則天下幸甚臣生長革門不見異物雖有賢才所未接識不敢瞽言妄舉無以疇答聖問

郤廣基賢良策對

東京之流裔汴宋之先驅
伏惟陛下以聖德君臨猶垂意於博採故招賢正之士而臣等薄陋不足以降大問也是以竊有自疑之心雖致身於闕庭亦僂俛矣伏讀聖策乃知下問之旨篤焉臣聞上古推賢讓位教同德一故易簡而入化三代世及季末相承故文繁而後整虞夏之相因而損益不同非帝王之道異救弊之路殊也周當二代之流承彫僞之極盡禮樂之致窮制度之理其文詳備仲尼因時宜而曰從周非殊論也臣聞聖王之化先禮樂五霸之興勤政刑禮樂之化深

駢十

七

政刑之用淺勤之則可以小安墮之則遂陵遲所由之路本近故所補之功不侔也而齊桓失之葵邱夷吾淪於小器功止於霸不亦宜乎策曰建不刊之統移風易俗使天下洽和何修而嚮茲臣以爲莫大於擇人而官之也今之典刑匪無一統宰牧之才優劣異績或以之興或以之替此蓋人能宏政非政宏人也舍人務政雖勤何益臣竊觀乎古今而考其美惡古人相與求賢今人相與求爵古之官人君責之於上臣舉之於下得其人有賞失其人有罰安得不求賢乎今之官者父兄營之親戚助之有人事則通無人事則塞安得不求爵乎賢苟求達達在修道窮在失義故靜以待之也爵苟可求得在進取失在後時故動以要之也動則爭競爭競則朋黨朋黨則誣誣誣則臧否失實真僞相冒主聽用惑姦之所曾也靜則貞固貞固

則正直則信讓信讓則推賢推賢不伐相下無矜士
聽用察德之所趣也故能使之靜雖曰高枕而人自正不
能禁動雖復夙夜俗不一也且人無愚智咸慕名官莫不
飾正於外藏邪於內故邪正之人難得而知也任得其正
則衆正益至若得其邪則衆邪亦集物繁其類誰能止之
故亡國失世者未嘗不爲衆邪所積也方其初作必始於
微微而不絕其終乃著天地不能頓爲寒暑人主亦不能
頓爲隆替故寒暑漸於春秋隆替起於得失當今之世宦
者無關梁邪門啟矣朝廷不責賢正路塞矣得失之源何
以甚此所謂責賢使之相舉也所謂關梁使之相保也賢
不舉則有咎保不信則有罰故古者諸侯必貢士不貢者
削貢而不適亦削夫士者難知也不適者薄過也不得不
責彊其所不知也罰其所不適深其薄過非恕也且天子

於諸侯有不純臣之義斯責之矣施刑之道寧縱不濫之
矣今皆反是何也夫賢者天地之紀品物之宗其急之矣
故寧濫以得之無縱以失之也今則不然世之悠悠者各
自取辨耳故其材行並不可必於公則政事紛亂於私則
汗穢狼籍自頃長吏特多此累有亡命而被購懸者矣有
束縛而絞戮者矣貪鄙竊位不知誰升之者獸兕出檻不
知誰可咎者網漏吞舟何以過此人之於利如蹈水火焉
前人雖敗後人復起如彼此無已誰止之者風流日競誰
憂之者雖今聖思勞於夙夜所使爲政恒得此屬欲聖世
化美俗平亦俟河之清耳若欲善之宜劄舉賢之典峻關
梁之防其制既立則人慎其舉而不苟則賢者可知知賢
而試則官得其人矣官得其人則事得其序事得其序則
物得其宜物得其宜則生生豐植人用資給和樂興焉是

故寡過而遠刑知耻以近禮此所以建不刊之統移風易俗刑措而不用也策曰自頃夷狄內侵災眚屢降將所在非其人乎何繇而至此臣聞蠻夷猾夏則臯陶作士此欲善其末則先其本也夫任賢則政惠使能則刑恕政惠則下仰其施刑恕則人懷其勇施以殖其財勇以結其心故人居則資贍而知方動則親上而志勇苟思其利而除其害以生道殺之者雖死不貳以逸道勞之者雖勤不怨故其命可授其力可竭以戰則勉以攻則叛是以善者慕德而安服惡者畏懼而削迹止戈而武義實在文唯任賢然後無患耳若夫水旱之災自然理也故古者三十年耕必有十年之儲堯湯遭之而人不困有備故也自頃風雨雖顯不時考之萬國或境土相接而豐約不同或頃畝相連而成敗異流故非天之必害於人人實不能均其勞苦失之於人而求之於天則有司惰職而不勸百姓殆業而咎時非所以定人志致豐年也宜勤人事而已臣誠愚鄙不足以奉對聖朝猶進之於廷者將使取諸其懷而獻之乎臣懼不足也若收不知言以致知言臣則可矣是以辭鄙不隱也

王元長永明九年策秀才文五首

問秀才高第明經朕聞神靈文思之君聰明聖德之后體道而不居見善如不及是以攄嗣有順風之請華封致乘雲之拜或揚旌求士或設虞待賢用能敷化一時餘烈千古朕寅奉天命恭惟永圖審聽高居載懷祇懼難言事必史而象闕未箴寤寐嘉猷延佇忠實予大夫選名升學利用賓王懋陳三道之要以光四科之首鹽梅之和屬有望焉

又問昔周宣惰千畝之禮號公納諫漢文缺三推之義賈生置言良以食爲民天農爲政本金湯非粟而不守水旱有待而無遷朕式照前經寶茲稼穡祥正而青旗肅事土膏而朱紘戒典將使杏花菖葉耕獲不愆清剛冷風述遵無廢而釋耒佩牛相沿莫反兼貧擅富浸以爲俗若爰井開制懼驚擾愚民烏鹵可腴恐時無史白興廢之術矢陳厥謀

又問議獄緩死大易深規敬法恤刑虞書茂典自氓俗澆馳法令滋彰肺石少不寃之人棘木多夜哭之鬼朕所以明發動容尺食與慮傷秋荼之密網惻夏日之嚴威永念畫冠緬追刑措徒以百鈸輕科反行季葉四支重罰爰創前古訪游禽於絕澗作霸秦基歌雞鳴於闕下稱仁漢牘二塗如爽卽用兼通昌言所安朕將親覽

駢十

十

又問聚人曰財次政曰貨泉流表其不匱懋遷通其有亡既龜貝積寢縉纒專用世代茲多消漏參倍下貧無兼辰之業中產闕游歲之賞惟瘼卹隱無捨矜歎上帝溥臨賜朕休寶命卽斜之谷開而出銅且有後命事茲鎔範充都內之金紹園府之職但赤仄深巧學之患榆莢難輕重之權開塞所宜悉心以對

又問治厯明時昭遷革之運改憲勅法審刑德之原分命顯於唐官文條炳於鄒說及岫夷廢職味咎虧方漢秉素祇之徵魏稱黃星之驗紛詵空軫疑論無歸朕獲纂洪基思洪至道庶令日月休徵風雨玉燭克明之旨弗遠欽若之義復還於子大夫何如哉其驪翰改色寅丑殊建別白書之

王元長永明十一年策秀才文五首

問秀才朕秉錄御天握樞臨極五辰空撫九序未歌至於
思政明臺訪道宣室若隆之惻每勤如傷之念恒軫故恤
貧緩賦省徭慎獄幸四境無虞三秋式稔而多黍多稌不
興兩穗之謠無褐無衣必盈七月之歎豈布政未優將罷
民難業登爾於朝是屬宏議罔弗同心以匡厥辟
又問惟王建國惟典命官上叶星象下符川嶽必待天爵
具修人紀成事然後沿才授職揆務分司是以五正置於
朱宣下民不忒九工開於黃序度績其疑周官三百漢位
兼倍厯茲以降游惰實繁若閑冗畢奔則橫議無已冕笏
不澄則坐談彌積何則可修善詳其對

又問昔在賢牧分陝良守共治下邑必樹其風一鄉可以
爲績至有旦撫鳴琴日置醇酒文而無害嚴而不殘故能
出入於阡危之域躋俗於仁壽之地是以賈誼言天下之
有惡吏之罪也頃深汰珪符妙簡銅墨而春雉未馴秋螟
不散入在朕前湊其智畧出連城守闕爾無聞豈薪慙之
道未宏爲網羅之目尙簡恣意正辭無侵執事

又問朕聞上智利民不述於禮大賢彊國罔圖惟舊豈非
療飢不期於鼎食拯溺無待於規行是以三王異道而共
昌五霸殊風而並烈今農戰不修文儒是競棄本徇末厥
弊滋多昔宋臣以禮樂爲殘賊漢王比文章於鄭衛豈欲
非聖無法將以旣道而權今欲專士女於耕桑習鄉閭以
弓騎五都復而事庠序四民富而歸文學其道奚若爾無
而從

又問自晉氏不綱關河蕩析宋人失馭淮汴崩離朕思念
舊民永言攸濟故選將開邊勞來安集加以納款通和布
德修禮歌皇華而遣使賦膏雨而懷賓所以關洛動南望

之懷獯夷遽北歸之念夫危葉畏風驚禽易落無待干戈
聊用辭辯片言而求三輔一說而定五州斯路何階人誰
或可進謀誦志以沃朕心

任彥升天監三年策秀才文三首

問秀才朕長驅樊鄧直指商郊因藉時來乘此應運當展
永念猶懷慙德何者百王之敝齊季斯甚衣冠禮樂掃地
無餘彫斲列方經綸草昧探三王之禮冠履龕分因六代
之樂宮判始辨而百度草創倉廩未實若終畝不稅則國
用靡資百姓不足則惻隱深慮每時入芻稟歲課田租愀
然疚懷如憐赤子今欲使朕無滿堂之念民有家給之饒
漸登九年之蓄稍去闕市之征子大夫當此三道利用實
王斯理何從佇聞良說

問朕本自諸生弱齡有志閉戶自精開卷獨得九流七畧

駢十

十三

頗嘗觀覽六藝百家度非牆面雖一日萬機早朝晏罷聽
覽之暇三餘靡失上之化下草偃風從惟此虛寡弗能動
俗昔紫衣賤服猶化齊風長纓鄙好且變鄒俗雖德慙往
賢業優前事且夫縉紳道行祿利然也朕傾心駿骨非懼
真龍輻輳青紫如拾地芥而惰游廢業十室而九鳴鳥獲
聞子矜不作宏獎之路斯旣然矣猶其寂寞應有良規
問朕立諫鼓設謗木於茲三年矣比雖輻湊闕下多非政
要日伏青蒲罕能切直將齊季多諱風流遂往將謂朕空
言慕古虛受弗宏然自君臨萬寓介在民上何嘗以一言
失旨轉徙朔方睚眦有違論輸左校而使直臣杜口忠讜
路絕將恐宏長之道別有未周恣意以陳極言無隱

樊孝謙升中紀號對

臣聞巡嶽之禮勒在虞書省方之義著于易象往帝前王

匪惟一姓封金刊玉億有餘人仲尼之觀梁甫不能盡識
夷吾之對齊桓所存未幾然盛德之事必待太平苟非其
人更貽靈譴秦皇無道致風雨之災漢武奢滛有奉車之
害及文叔受命炎精更輝四海安流天下輯睦劍賜騎士
馬駕鼓車乃用張純之文始從伯陽之說至於魏晉雖各
有君量德而處莫能擬議蔣濟上言於前徒穢紙墨袁淮
發論於後終未施行世歷三朝年將十祀啓聖之期茲爲
昌會然自水德不競函谷封塗天馬息歇苞茅絕貢我太
祖收寶雞之瑞握鳳凰之書體一德以匡朝屈三分而事
主蕩此妖寇易如沃雪但昌旣受命發乃行誅雖太白出
高中國宜戰置之度外望其遷善伏惟陛下以神武之姿
天然之畧馬多冀北將異山西涼風至白露下北上太行
東臨碣石方欲吞巴蜀而掃嶠函苑長洲而池江漢復恐

聯十

三

迎風縱火芝艾共焚按此六軍未申九伐夫周發牙璋漢
馳竹使義在濟民非聞好戰至如投風忌器之說蓋是常
談文德懷遠之言豈識權道今三臺令子六郡良家蓄銳
須時裹糧待詔未若龍駕虎服先收隴右之民電轉雷驚
因取荆南之地昔秦舉長平金精食昂楚攻鉅鹿枉矢皆
流况我威靈能無協贊但使彼之百姓一覩六軍似見周
王若逢司隸然後除其苛令與其約法振旅而還止戈爲
武標金南海勒石東山紀天地之奇功被風聲于千載若
令馬兒不死子陽尙在便欲案明堂之圖草射牛之禮比
德論功多慙徃列升中告禪臣用有疑

樊孝謙求才審官對

臣聞雕獸畫龍徒有風雲之勢金舟玉馬終無水陸之功
三駕禮賢將收實用一毛不拔復何足取是以堯作虞賓

遂全箕山之操周移商鼎不納孤竹之言但處士盜名雖云久矣朝臣竊位蓋亦實多漢拜丞相便有鐘鼓之妖魏用三公乃至孫權之笑故山林之與朝廷得容非毀肥遯之與實玉黷有優劣至于時非蹈海而曰羞作秦民事異出關而言耻從衛亂雖復星千帝座不易高尚之心月犯少微終存耿介之志自我太嶽之後克廣洪業禹至神宗舜格文祖陛下受天明命光華日月爰自納麓乃格文祖儀天地以設官象星辰而布職漢家神鳳慙用紀年魏氏青龍羞將改號上應列宿咸是異人下法山川莫非奇士所以畫堂甲觀修德日新廟鼎歌鍾王勳茂委循名責實選衆舉能朝無銅臭之公世絕錢神之論昔百里相秦名存雀錄蕭張輔沛姓在河書今日公卿抑亦天授與之爲治何欲不遂未必稽首天師方聞牧馬之術膝行山上始得治身之道但使帝德休明自強不息甲夜觀書支日通奏周昌桀紂之論欣然開納劉毅桓靈之比終日含宏高懸王爵惟能是與管庫靡遺漁鹽畢錄無令桓譚非議官止于郡丞趙壹負才位終于計掾則天下宅心幽明知感歲精仕漢風伯朝周真人去而復歸台星坼而還欽詩稱多士易載羣龍從此而言可以無愧

樊孝謙釋道教對

臣聞天道性命聖人所不言蓋以理絕涉求難爲稱詣伯陽道德之論莊周逍遙之旨遺言取意猶有可尋至若玉簡金書神經秘錄三尺九轉之奇絳雪元霜之異淮南成道犬吠雲中子喬得仙劍飛天上皆是憑虛之說海棗之談求之如係風學之如捕影而燕若齊后秦皇漢帝信彼方士冀遇其真徐福去而不歸樂大性而無獲猶謂升遐

例影抵掌可期祭鬼求神庶或不死江壁旣返還入驪山之墓龍媒已至終下茂陵之墳方知劉向之信洪寶沒有餘責王充之非黃帝比爲不相又未葉已來大存佛教寫經西土畫像南宮昆池地黑以爲燒劫之灰春秋夜明謂是降神之日法王自在變化無窮置世界於微塵網須彌於忝米蓋理本虛無示諸方便而妖妄之輩棄家出家藥王幡軀渡野灑血假末能然猶當克命寧有改形易貌有異生人恣意放情還同俗物龍宮餘論鹿野前言此而得容道風前墜伏惟陛下受天明命屈已濟民山鬼効靈海神率職湘中石鷺冰時雨而羣飛臺上銅烏翹和風而杓轉以周都洛邑治在鎬京漢宅咸陽魂歸豐沛汾晉之地王迹維始眷言巡幸且勞經畧猶復降情文苑斟酌百家想執玉於瑤池念求珠於赤水竊以王母獻環由感周德

駢十

五

上天錫珮實報禹功二班勒史兩馬製書未見三世之辭無聞一乘之旨帝樂王禮尙有時而沿革左道怪民亦何疑于沙汰

樊孝謙刑罰寬猛對

臣聞惟王建國刑以助禮猶寒暑之贊陰陽山川之通天地爰自朱葉法令稍滋素篆無以窮書楚竹不能盡載有司因此開以二門高下在心寒熱隨意周官三典棄之若吹毛漢律九章違之如覆手遂使長平獄氣得酒而後消東海孝婦因災而力雪詔書掛壁有善而莫遵姦吏到門無求而不可皆出王矣其道民不見德而議者守迷不尋其本鍾繇王朗追怨疑蒼祖訥梅陶共尤文帝便謂化屍起偃在復肉刑致治興邛無關周禮伏惟陛下味爽坐朝留心政術明罰以糾諸侯申恩以孩百姓黃旗紫蓋已絕

東南白馬素車將醫軀道若復峻典深文臣實未悟何則
人肖天地俱稟陰陽安則順存擾則圖死故王者之治務
先禮樂如有未從刑書乃用寬猛兼設水火俱陳未有專
任商韓而能長久苛秦歸士會晉盜來奔舜舉皋陶不仁
自遠但令釋之定國迭作理官龔遂文翁繼爲郡守科間
律令一此憲章欣聞及黜之言泣斷招李之罪則天下自
治大道公行孔獸舍牙倉鷹垂翅楚王錢府不復須封漢
獄寃囚自然蒙理後服之徒旣承風而慕化有蓋之內著
蹈德而詠仁號以城隍何難之有

樊孝謙禍福報應對

臣聞五方易辨尙待指南百世可知猶須吹律况復天道
秘遠神迹難源不有通靈孰能盡悟乘槎至於河漢惟觀
牽牛假寐遊于上元止逢翟大造化之理旣寂寞而無傳

駢十

天

報應之來固難得而妄說但秦穆有道勾芒錫祥虢公涼
德壽收降禍高明在上定自有知不可謂神莫昧難信若
夫仲尼厄於陳蔡孟軻困於齊梁自是不遇其時寧關報
應之理子胥無首馬遷廢下受誅取辱何可尤人至如協
律見親擢舩得幸從此而言更不足怪周王漂杵致天之
罰白起誅降行己之意是以七百之祚仍加姬氏杜郵之
戮還屬武安昔漢問上計不過日蝕晉策秀才止於寒火
前賢往士咸用爲難推古比今臣見其易然草萊百姓過
荷恩私三折寒膠再遊金馬王言昭賁思若有神占對失
圖伏深悚懼

合河蕭氏
別輝家韻



